

671.3435  
084  
:5

西平縣志

吳園生署



西平縣志總目錄

總纂陳銘鑑編

卷首 序 評識 題辭 修輯職名 募集刊

資記 凡例 正志及附志目錄 縣總圖及

分圖

共八幅

正志

卷一至卷七 輿地志一

疆域篇上 疆域沿革攷 道里 經緯度曜野

疆域篇下 山水攷 山系 水系 溝渠

建置篇上 城池 廨署 局會 義卹 交通 倉

建置篇中 縣城內街巷 縣區 市鎮 圖保表

西平縣志 卷首 總目錄

建置篇下

自治區及鄉鎮

寺廟

坊表

橋梁

津渡

古蹟篇

城柵  
校序

谿沼

岡陵

亭臺

宅里

塚墓

物產篇

動物

植物

卷八卷九

氏族志二

氏族篇上

于氏

牛氏

邵氏

杜氏

王氏

李氏

宋氏

吳氏

耿氏

袁氏

栗氏

高氏

葛氏

楊氏

趙氏

劉氏

焦氏

氏族篇下

陳氏

張氏

郭氏

馮氏

焦氏

溫氏

鄭氏

韓氏

關氏

葛氏

楊氏

趙氏

劉氏

焦氏

溫氏

卷十至卷十二 經制志三

禮樂篇

祠祀

禮典

樂章

祝文

通用樂

賦役篇

賦役上

賦役中

賦役下

丁口

鹽課

學校篇

書院

義學

學校

學田

學校基金及  
經費  
圖書館

卷十三至卷三十三 文獻志四

封建篇

兵事篇

歷代兵事

藝文篇

職官篇

知縣表

訓導表

縣知事表

縣長

縣丞表

把總表

警官表

局長

承審員表

縣視學員表

管獄員表

財政局長表

建設局長表

教育

選舉篇

薦辟篇

明清貢舉表

明清武科表

議

諸員表

清諸

表身

摺紳篇上

歷代實官表  
文武實官表

明代文武實官表  
獎敘表  
封贈表

清代  
廕襲

表

捐納表

椽

吏表

耆壽表

摺紳篇下

文官表  
公職表

軍官表  
黨員表

警官

名宦篇一

名宦事略上

宋

袁廓

元

李不作

和元恕

明

萬安

王佐

江珙

王來鳳

李孟春

張應化

王國柱

鄭繼僑

李完

孔汝孝

夏萬亨

高斗垣

名宦篇二

名宦事略下

清 劉名世 韓士傑 徐 珊 張名世

王鳴燦 沈 棻 李弘植 湯顯相

李德林 李 釗 宮國勳 杜傑魁

李待時 楊 溶 李名壘 華 綦

左 輔 王錫侯 張鳳岐 程嘉穀

朱名炤

民國 洪壽昌 周德宣

人物篇一

列傳第一 邗惲

子壽附

列傳第二 李咸

列傳第三 伍孚

列傳第四 和洽

列傳第五 和嶠

列傳第六 梅頤

列傳第七 梅陶

列傳第八 和洪

人物篇二

列傳第九 徐理

列傳第十 衡岳

列傳第十一 于宣 郭五常

列傳第十二 王 誥

列傳第十三 毛 祥 劉 素 李克敏

列傳第十四 徐文英 賈德山 陳 紳

楊 舉

列傳第十五 楊士英 魏 芳 吳 靜

王之棟 夏名文 楊積石

列傳第十六 王 訓 子胤 祚附 張應軾

列傳第十七 尹 冕 張文佐 徐惟性 弟惟 孝附

李 安 楊 勳

列傳第十八 宋自勉 趙 鑑 張伯楠



張德惠

列傳第十九 宋光榮 宋光灼 趙 鏞

劉學詩

列傳第二十 劉洪起

列傳第二十一 金梁先生 桂林禪師

人物篇三

列傳第二十二 樊中林

列傳第二十三

張高雋

子平浣孫  
知通附

列傳第二十四 譚 瑄

列傳第二十五 趙永漲 張素裕 張惠民

列傳第二十六

趙宗猷

子伯升孫成蓋附

列傳第二十七

邵寶華

列傳第二十八

劉際晟

范克勤

趙五春

趙方舟

陳少南

劉西川

列傳第二十九

于凌雲

劉培坤

趙殿陞

劉清灼

李素甲

鄭贊臣

朱振玉

列傳第三十

趙性壹

趙松垣

趙信成

趙漢翀

列傳第三十一

楊

權

子耀奎附

列傳第三十二 陳克灼 趙士緇 張良瓚

劉校書 王以德 王守恕

胡汀 朱炳

列傳第三十三 侯爵 趙演寅 趙建寅

楊兆麟 子永亮附 陳錫銘

衡濟川 陳少卿 蕭景瑞

列傳第三十四 劉曉樓 袁應西 張瑤津

鄭名卿 朱蘭馨 苗雲秀

趙三畏

人物篇四

列傳第三十五

陳蔚昌

子榮熙載熙孫國順附

列傳第三十六

陳鴻賓

子炳煊孫增銳附

列傳第三十七

黃逢辰

趙性善

李錫元

李居仁

王明善

趙賀春

吳春鎔

劉俊儒附

列傳第三十八

張士從

袁鳳桐

陳依中

陳中書

列傳第三十九

焦純德

韓晝

子允西附

史賡雲

劉照離

于冠奇

列傳第四十

萬崑

子錫榮附

袁遐齡

鄭翰臣

楊成方 李在藻

列傳第四十一 陳朗山 趙麟紱

列傳第四十二 毛 憲 葛茂林 楊漣清

列傳第四十三 栗廉芳

人物篇五

列傳第四十四 張泮輝

李近性附

列傳第四十五 王居易 葛景和 高存義

關鴻恩 陳金鑿

列傳第四十六 陳錫庚 陳 臺

弟棟附

馮佩仲 李金剛

列傳第四十七 王炳南 葛 晔 陳 釗

戴耀璋 李國棟 夏 闕

翟鳳儀 劉慶餘

列傳第四十八 張作哲 陳俊儒 焦中清

列傳第四十九 王 同 王海金 趙增海

高魁元 張元相 陳碩山

子國

禮附 鄭之環

列傳第五十 曹錫鞏 鞏慶祥 朱 廷

列傳第五十一 鞏 化 劉慶長 李伯讓

陳善政

弟炳南附

人物篇六

列傳第五十二 劉宏義 汪心純 鄭德讓

張錦林 楊景祥 楊景震

列傳第五十三 謝 申 郭秉虔 楊恩榮

陳錫桓 謝長年 劉居廣

劉沂汶 劉寶善

列傳第五十四 黃 通 趙五全 于忠良

于西海 馮厚望 王進元

陳錫睿

列傳第五十五 栗攀龍

子凌雲慶雲  
孫雁名附

列傳第五十六

于明哲

孫冠羣附

范玉魁

陳重三

韓玉松

楊桂芳

列傳第五十七

張殿魁

于飛龍

宋太平

陳占魁

張鳳岐

鞏培蘭

王合春

列傳第五十八

趙連珠

陳麟德

子岱山孫國寶附

張鳳鳴

列傳第五十九

張景善

戴時清

劉福申

列傳第六十

牛燦辰

魏鶴鳴

于福純

于省三

徐克明



列傳第六十一 劉雅巴 王復元 常化

武振邦

人物篇七

列女傳

陳郭莊勤 栗朱氏

右賢母

孫王氏 趙陳氏 魏陳氏 郭楊氏

耿趙氏 董魏壽姐 趙白氏

劉趙氏 胡師氏 祝張氏 杜劉氏

陳謝氏 陳趙氏 苗路氏

右節孝婦

毛田氏 張趙氏 王范氏 王王氏

孫王栗氏附

右節婦

楊趙氏 溫崔氏 陳李苓 許劉氏

右烈婦

陳耿氏 右貞女

周采蘋 李明良 張誠姐 于靈姐

楊應姐 郭繪姐 右烈女

人物篇八 列女表上 賢母表 良妻表 節孝婦表

人物篇九 列女表中 節婦表

人物篇十 列女表下 孝婦表 烈婦表 孝女表 貞女表 烈女表 才女表

團防篇

義勇篇

卷三十四至卷四十 故實志五

災異篇

名勝篇

風俗篇

方言篇

匪劫篇

軼聞篇

辨證篇

卷末

自序

西平縣志附編目錄

附志

文徵卷一

漢至明代外籍人文

文徵卷二

清代外籍人文

文徵卷三

民國建元後外籍人文

文徵卷四

明清兩代本籍人文

文徵卷五

民國建元後本籍人文

文徵卷六

明清兩代暨民國初葉外籍人詩

文徵卷七

明清兩代本籍人詩

文徵卷八

清季及民國初葉本籍人詩

西平縣志卷首終

西平縣志卷二十 文獻志 名宦篇一

名宦事略上

舊志官吏列入官師志其有事績可紀者則散見於封建宦蹟職官各類茲編將封建及職官別爲志表而擇其宦蹟較著者詳載如左名曰名宦事略其有文字流傳者竝附著焉

宋

袁廓劍州梓潼人太祖時以進士爲西平主簿勾稽漏籍得民丁萬餘州將薦其勤職遷上蔡令又以課最擢太子右贊善大夫

元

李不作大名人大德閒爲西平尹化民以德不尙威嚴民興禮讓暇日聚徒親爲講授人皆以不學爲恥汝水泛濫率民築防補罅二十餘處患遂息並建重渠橋以利行旅當時民歌之曰公憂官事如家事人道詩聲似頌聲

和元恕陽穀人至治二年爲西平尹勸農興學折節好賢民有訟不用鞭扑惟諭以曲直人皆改悔在任五年公無負租蝗不入境

明

萬安洪武三年爲西平典史時承元末兵燹之餘安建公署立學校修城隍廟經營建設厥功甚偉

王佐山西潞州人正德五年知西平縣明年以秩滿將去  
會霸寇趙燧等至佐慨然曰佐去民誰與守卽繕城浚  
池練士卒與僚屬誓以死守已而賊大至晝夜環攻佐  
隨機捍禦卒以勢孤援絕城陷猶率死士巷戰手刃數  
十賊力竭罵賊而死縣丞毛秀一作繡山東人教諭程輔德訓  
導彭輔皆死之事聞贈佐光祿寺少卿命有司立祠祀  
之蔭一子入監

江珙江南歙縣人弘治甲子貢士正德十五年爲西平尹  
清介絕俗御下嚴峻積日所爲朔望率其屬以告於神  
嘗有饋生魚者計其直酬之由是私饋遂絕珙懲霸寇  
之變創修甑城城完三面鄉民猶有未知者其不以財



力病民如此去後士民立祠祀之

王來鳳陝西富平人恩貢生嘉靖八年宰西平葺治公署積穀六萬斛值歲荒振活甚眾未幾遷安樂知州以親老致仕西平士民追思其德爲立二良祠祀之二良者來鳳與江珙是也河南提學副使德平葛守禮爲撰二良祠記其文曰二良祠者故西平尹江王二君之祠也孰祀之邑之耆庶若士大夫祀之也于時二尹去一紀餘矣而祠興君子異焉夫自貞風不起貪殘競生吏其土者率以漁民而爲之民者亦多蠹視其吏幸其一朝去若有脫焉而又何思之久而不忘乎追祀之事可以觀二尹之政矣江以正德庚辰縮篆天性儉勤能甘淡

泊卽日所爲朔望率其屬以告于神民有饋生魚者計其直授之由是私餽絕戢其吏無敢取于人者懲卒未流賊入城之變以土垣築不補墮議爲輒城請于監司可之乃以嘉靖改元冬始役輒埴之工取閒民執事于官者暇日爲之薪爨則課稅之餘繼以官路朽株未嘗以財力病民城完三面之日遠民猶有不知者會銓司聞其賢歲乙酉徵入傾城郊送愛而莫能留也賢矣哉越三年己丑王乃來值歲不足流民枕藉惻然以爲有司責庚寅幸大熟請出藏糴穀益以訟獄贖罰得穀數萬斛乃擴縣預備倉爲楹五十有四貯之江之城工有堵者至是繕以三月而完在政吏無稽牘獄無停囚不

事苛刻而凜不可干其諸去淫祠表忠義平徵歛詳會計直餘事耳而守己之介雖承獎亦不受賀甲午擢守安樂州辭以親老不赴任賢矣哉不遇隆寒不能知挾纊之温二尹在任暨初去人德之未深也乃丁酉庚子歲薦旱蝗人相食天子遣重臣督賑西平以素蓄散之民得不死壬寅寇警澤潞大河南北震于其隣朝廷檄下繕城堡遠近騷動西平以堅城獨冥然于是邑人老稚追思二尹有若顧復之思矣思之不置乃相率度邑南郭爲祠欲歲時俎豆禱祥必以告蓋大夫贊成之而太守王子誥其倡也余聞而義之曰惠大于其遺故于譽者無功感深于所追故驅虞者爲假斯舉也有古道

也夫因名其祠曰二良言比漢循良也爲之言以紀歲月江尹名珙徽之歙縣人甲子貢士王尹名來鳳關中富平人起家恩貢云

李孟春湖廣蘄州人萬歷二十年爲西平宰政務養民積弊盡剔會大祲民相殘食孟春百方拯救老弱啖粥糜丁壯畀錢穀病者給藥餌死者收而瘞之全活極眾越歲秋蜚蝗卒至孟春齋沐詣蝗所籲天罪己蝗遽他徙出境民始有秋顧頻年饑饉逋負者甚多孟春以災祲之餘弗忍督責乃取家貲於蘄以應當道疑其催科不力削俸示罰嘆曰吾民苟得息肩我何以俸爲民間之咸感泣于是爭相輸將不數月而額辦其德政化民如

此二十六年大計考最遷重慶府丞遂解印綬歸當道以循良疏聞命以南京刑部主事致仕蓋異數也邑人追慕弗已爲畫像而生祠之給事中汝陽桂有根爲撰去思祠記其文曰夫物以精感則化精也者不翼而飛不足而行無礙無眇無不至無不入也黃虞以還幾治于化庸詎數數見哉乃其敷以文命章程繩之以樸楚而民有愈不格者精不貫也故古人修意前民以神今人修政冀效于迹何異乎治不相及也蕪陽李公以鄉進士來令茲邑萬歷壬辰甫臨政三日詔耆老部民訊之曰爾邑民其適乎其抑有不獲者乎吾以往吾無若及吾以還吾其與若聚書老部民咸唯唯退相謂曰吾

乃今有父母矣居頃歲會大屨沴饑饉摧挫民至轉相  
魚肉流離奔竄莽舍邱墟人心洶洶蓋天地爲之易色  
公爲憮然曰赤子何辜罹茲大咎非予生之其誰乎予  
是疏聞請發帑金以賑老弱炊粥啖之壯丁給錢穀追  
流亡散結聚息者起之骨無收者瘞之以地貸生資種  
俾民稍稍歸本業旣而有蝗至公曰嗟吾始生之若又  
奪之食是食吾民也乃齋沐從蝗所祭且禳之俄而蝗  
反徙出他境不爲害民卒得就食焉然數饑歲額逋負  
公輒緩縱以甦瘡痍當道數下令催科公間爲探囊金  
于薪以應急救不忍以饑餓殘喘當督責之命已而上  
怒罰俸而促之公曰倘吾民得息肩一日免于離散卽

以此報國家奚不可者吾何以俸爲民間之感泣相與  
負擔輸納不期月而額辦公無勞聲色也戊戌當大計  
公以考最陞授重慶府丞遂解印綬歸田里去語邑民  
曰幸識若輩得共甘苦數年備觀造化之變今可稍告  
無罪余心足矣巴郡之行非我願也當道以疏聞天子  
下詔曰同知某令西平六年清勤供職實心爲民救荒  
足方略不伐有勞寵辱不驚精誠孚及異類是大有功  
于朕朕甚嘉之今遽以官乞休致朕不忍奪其加陞南  
刑部主事致仕以優榮焉邑民曰公國家之功臣我之  
二天也國家報功以爵猶不次而足吾輩答天其寧有  
極哉亦惟是崇象而尊之樹祠而享之猶庶幾旦夕志

不忘我父母于膝下則我之所以報公也祠成屬余爲  
記願余惡足知李公哉蓋竊窺之公居常孝友刑于爲  
鄉人模楷有弟大司馬學憲咸出門下爲名世大儒則  
其爲人不必問六歲宰邑未嘗一便身圖廳署蕭然清  
苦自牧然一當民利病則有如慈母之養嬰兒兢兢惟  
恐失墜不及保之爲患此其命衷可想矣說者謂公美  
大者在作興士類增修學宮立義學訓良家子申飭鄉  
保以提醒愚盲買義田鑄大將軍火器均編傳馬清保  
甲祛除習弊諸所厝注種種可勒金石不知此特公之  
餘緒耳公之衷渾渾噩噩窳于天倪冲然亡染遇民而  
民格觸物而物化不煩設置而揭日月貫金石此公所



爲操于希夷而行乎宇宙也夫苟著一有爲而爲之心必且虞利害矜得喪營營逐逐日墮汶闡其胡以鏡治心不鏡治而欲民之無失所也無由矣矧若于化哉故曰物以精感則化公者以精治者也惟精則神神固必祠焉則今日之民思是公矣公諱孟春湖廣之蘄陽人張應化浙江蒲江人舉人萬歷二十六年爲西平知縣修學宮啟聖祠書院城隍廟置學田漏澤園

王國柱陝西雒南人

一說涇陽人

選貢萬歷間知西平精明愷

悌創建文城書院立社課文士風丕振

鄭繼喬江西德安人舉人天啟二年爲西平宰愛民重農教崇學校簡刑薄斂絃誦不輟

李完四川西充人進士天啟四年爲西平令政持大體不  
寄人耳目遇事立斷豪強屏迹尤重視學校風采爲一  
時最尋調知南陽縣事

孔汝孝山東曲阜人舉人崇禎六年令西平政尙嚴峻有  
鄭子產火烈之風嘗修文昌閣闢雲路街以培文風未  
幾登科者有三人焉

夏萬亨字元禮南直崑山人萬歷戊午舉人婺源教諭崇  
禎十年升西平知縣時河南郡邑所在被寇萬亨修備  
甚嚴資性仁厚慈祥之氣見於眉宇文學德行皆足爲  
後人矜式更移文昌閣於城上巽方士饒文學登科不  
絕居三年改知夏邑卒以江西布政起兵拒清閭家殉

益王之難

高斗垣山西繁峙人恩貢崇禎十二年率西平負性耿直  
居官清慎十五年流寇陷城被執不屈死之

西平縣志卷二十一 文獻志 名宦篇二

名宦事略下

清

劉名世遼東人貢士順治六年任西平縣事天資英敏臨  
事明斷抑強扶弱政舉民安至設青藜館以作養多士  
尤爲曠典

韓士傑遼東寧遠人貢士順治十年知西平精明練達吏  
不敢欺去任時士民聯袂郊送多有扳轅揮淚者

徐勳杞縣人歲貢順治十三年任西平訓導獨倖課業講  
誨不倦士林奉爲模範焉未幾以兩臺交薦奉文裁訓

改選

張名世直隸雄縣人舉人順治十四年爲西平令居心平恕治事公勤凡遇科辦必殷殷以擾民爲戒清白自守日用常有不給之時焉

王鳴燦陝西安化人舉人順治十六年宰西平時經明季寇亂之餘舊志散佚鳴燦邀集邑紳張文學等在寶巖寺內創辦邑志繼往開來有功於西平文化甚大其自撰邑志敘曰嘗讀晉杜預春秋序云周禮有史官掌邦國四方之事達四方之志諸侯亦各有國史職方有攷歷漢有輿圖志後世師之凡郡國州邑莫不皆然若是乎志之爲重於古今也明矣是以王者統理萬物必置左右史以記言動焉矧親民之官撫有民社者哉果休

戚利病與民相關則必查建置之源流與制度之因革  
民風之貞淫人物之盛衰委曲詳悉無不經心然後用  
寬用嚴因其剛柔之所宜而化導之則扶進休隆游刃  
有資矣或者不察以爲挾藻翰墨溢美一時已耳豈足  
與言纂輯之深意乎西平舊有邑志因兵燹盡厄祖龍  
鳴燦承乏茲土遍索成書不得唯見邑之百事委頓倍  
難整飭滋忤忤懋已及詢名宿故老咸云數十年前尙  
有可觀而今則頽憊日甚也或衝疲之至于斯極歟抑  
田土之瘠下使然歟或百姓之頑梗歟抑往者教養之  
無方歟誠不知其故深懼綏輯之鮮術適中丞賈撫臺  
檄下全屬纂修邑志誠殷殷振興至意哉維時郡守金

公雅意課督仰副中丞公盛心竊思制作不備則吏治弗光良有司之責也鳴燦不敏簿書冗繁且受事日淺于邑事未悉雖然敢不恪恭乃事乎于是向學博孟君謀所以成之者孟云纂志必須才學識兼到者方可然德望不優輿論不協恐不足以懼眾心爰懇邑薦紳張君文學王賁劉楊輩一時共事者八人敦集寶巖精舍分任其事公襄以成或得之于殘碑斷碣或得之于老成記憶以及盛朝憲典無不備載尤期寧樸毋華寧詳毋略凡邑之利弊休戚皎如列眉更且善無微而不錄美有幽而皆揚亦庶幾周職方漢輿圖之遺意爾若云整救斯民之頽弊綏輯斯民之衰殘以無忝爲親民之

官則懼之忤忤益甚也吁後之視今亦猶今之視昔觀  
建置則知繭絲保障之匪易詳制度始知報效稱職之  
爲難察民風則知鼓勵振作之有自閩人物始知教化  
之所由興與凡搏節愛養此林林者或亦操刀者之一  
助歟過謂鳴燦有成勞則有共襄其役者在時順治十  
六年己亥歲十月旣望之吉安化王鳴燦書于柏亭退  
思堂

沈棻字藕菴浙江平湖人進士康熙元年爲西平令平心  
理事敦尚醇實輕徭賦修道路築隄岸勸農桑獎孝行  
懲奸蠹振興文教修輯邑志去奢崇儉弭盜安民治象  
政聲一時稱最焉後卒於任所邑人感其德爲建祠立



碑於縣治北門外碁於康熙九年庚戌秋七月自撰重  
修邑志序其文曰國有史家有譜所以章往烈詔來者  
使千載之下披圖爛然指顧可得也地志邑乘義同家  
國問山陵而不對訪人物而茫然人其謂之何夫令於  
一邑宜無所不通曉山川之阨塞幾何戶口之登耗幾  
何土田之壤瘠幾何問人材之盛衰何代爲最也武備  
之宜飭者何等也前修之嫩嫩以何政先哲之彪炳者  
何氏之高曾也了然於心目之間而後張弛厝注無往  
不得其當西平下邑其於神州僅如黑子之著面微星  
之麗周天然而爲汝南之上游滇楚燕趙之孔道羽書  
騎乘之徵無日不至其地民無薑蕪一遇煖涼率馬馱

散汙萊之土倍於穀土而又藩產之估佃安插之室廬  
交錯並至爲之令者手口俱瘡幸告無罪無論其他卽  
考舊章搜故牒整齊舊事勒成一書亦何暇哉余筮仕  
以來披覽前乘未當於心有意整輯之而未遑也九閩  
寒暑口詢掌錄頗得其端委爰取而重訂之去前志之  
成十有二年矣夫天道三年一小變十年一大變今者  
土著之眾卽向之輕去就逋竄相繼者也變矣而儉如  
故也穀麥之土卽向之荒翳滿目耒耜不刺者也變矣  
而瘠如故也絃誦有聲卽向之急衣食無暇禮節者也  
變矣而嗇如故也惰民有懲游手有禁卽向之冒法抵  
罪顛越不顧者也變矣而游衍如故也變者十六未變

者十四吏治之拙於此焉徵人事與抑天道也若夫掩前人之美余則何敢夫歐陽之紀五代陸游之傳南唐時日未遐各成論著未聞掠居正之長蓋馬令之善余又何論已

李弘植字培生直隸安州人歲貢康熙二十八年知西平地瘠賦重民多逃亡弘植輕徭緩征加意撫循歲餘民皆復業弘植復捐俸興學續修邑志增築柏亭北橋創建常平南北倉積穀備荒又以境內洪河潰決爲患每乘農隙督民固隄防疏支流並令各鄉村浚溝渠以備旱澇尤雅意作人遇能文者必薦拔之莅任五年民風丕變當時汝寧郡九屬循良之名以弘植稱首尋內陞

主事康熙三十年辛未冬嘉平月旣望弘植自撰續修志序文曰志何昉乎昉自古太史載輶軒詢方列國採風問俗攷山原曠澤之異剛柔燥溼之宜與經界疆域之詳物土舟車之利悉皆登於掌記載諸簡冊使夫宇宙六合之所珍所產以居以食萬彙羣生燦爛畢備一目了然以爲居尊馭卑在上臨下撫近綏遠之助於王朝有柱史氏於侯國有太史氏世紀其事守而無失後世因之而有方域志輿圖志迨及郡國州縣莫不各有紀載示褒貶於善惡寓揚刺於貞淫俾使往跡不致湮沒後世有所懲勸官其地者有所仰止生其土者有所景行藝古適集者有所向慕去就一道同風旨邇興遠

非徒列方技採異聞備文藝侈觀玩而已思深哉莫志  
若也西平疆域爲古柏子國垂世最永周末始廢意其  
時之民情必惇朴循理所以歷世久遠非近代之紛矜  
鄢陵比也鄢陵之俗其始於吳楚兵爭之際乎攷諸春  
秋吳伐楚戰於柏舉再戰於豫章三戰及郢遂入郢都  
况其先晉楚爭鄭禍結兵連柏舉爲楚疆場地惟經侵  
伐戰爭輓輸芻茭所謂耕鑿陶茅桑麻樂利蓋不暇及  
以故其時人文無傳柏舉之爲柏舉謂得尙有柏皇之  
流風餘韻哉戰國隸韓韓亦爭戰之國生聚教養杳矣  
蕙知秦置郡縣爰屬潁川汝潁故云多盜秦人又無禮  
義德化豈復望其能勞來安集於傍縣乎漢之興也乃

置爲西平縣漢代世崇名節重儒術所以其時遂有邳  
憚之忠義邳壽之廉能李咸之清直伍孚之剛毅山川  
蒸蔚於斯爲盛而人材亦於是乎爲最晉魏以來和氏  
梅氏輩出爲國之光以故歷元魏北齊後周有隋有唐  
屢改屢省而終不能沒西平之實延及於今弗變弘植  
於己巳夏釋鐸來茲見其民盡鳩形野多荒蕪邑鮮居  
人城乏樓郭駭然異之甫下車循行勞問始知地以小  
畝行糧賦旣重於他邑而正供之外又多雜辦催科繭  
絲歲無寧日且當楚粵滇黔之衝更多皇華釋騷之累  
小民不能勝差徭者往往走之他境所遺丁糧槩責諸  
現在之親隣如勢不能任又委諸里甲逃者愈逃累者

愈累而地又瘠下旱無所恃澇愈無所恃卽在豐年數畝所入旣以供父母又以畜妻子旣以完租賦又以辦牛種終實且貧指不勝屈而天時不能常登大有自國朝定鼎以來水旱相仍元氣未復衣食不裕因而禮義未生好勇疾貧鬪狠健訟亦勢使之然耳弘植身任民牧嘗思古良吏如劉杜卓魯皆能以天子命吏勤勞民社而能使暴戢民安時和物瑞當時形之歌頌奕禩載爲循良而弘植備員幾及二載戶口之凋殘如故四野之蒿萊如故民情之狙詐如故中夜自維抱慙形影何敢以管豹井天未識上與先哲爭纂修刪述之能雖素履聞有餘閒每披邑乘不過欲識道里井疆辨物土風

俗瞻故跡遺軌而已庚午歲蒙撫憲大中丞閻公垂念  
中州省志殘缺毅然重修仍咨郡縣各取舊志而修明  
之誠古今之盛事但弘植一介單寒十年苜蓿未能臻  
於大雅而西邑舊章失據典故罕聞不惟草創無人卽  
論修潤色亦覺其難副如欲延之他境則恐藉才異地  
亦未諳本邑風土卽使筆擅江花巧工天錦要亦華而  
失實博而鮮據是以不揣朴魯疏陋惟舉舊之所佩服  
新之所見聞取前邑宰沈君所修邑志而繕訂之歸於  
寧朴毋華寧骨毋肉寧質毋文以爲斯土紀信閒有一  
二採之輿論得諸傳聞亦不過舉往昔遺事備將來觀  
型未嘗以一己臆見妄爲增損使夫後之覽斯志者望



柏皇之餘韻溯漢晉之遺風思前之何以光聯史冊後  
之何以寂寂無聞庶有所觀感而興起不僅爲列方技  
採異聞備文藝侈觀玩而已是則大中丞之德意斯邑  
之厚幸矣如曰纂修刪述以與前哲爭美則弘植豈敢  
湯顯相字伊衡號莘畝江西南豐人丙子科舉人乾隆三  
十五年宰西平學問淵雅兼饒吏材治獄明允不事鞭  
扑凡興學課士治河繕城修橋備荒諸政無不畢舉又  
修葺文廟萬壽宮創造文昌閣奎星樓儒學署復將城  
北節孝祠移置於文廟側在任六年民極愛戴嘗爲德  
政頌刻石紀之顯相有自撰留保廣生祠碑記文曰身  
稱天道大生地地道廣生管子之言曰生我者父母也讀

經史所載知生生不已之道本於天地父母耳未聞別有神焉握其柄而降之嗣者然而世傳姜嫄祠於高媒聖母禱於尼山由此以推藉非有神焉誕厥靈而爲之覆育則古所謂祀而禱之者又何以稱焉留保舊有廣生祠正誕生之神民所祀而禱之者也邇年仰藉神庥斯保之民日益生聚而又疹癘不逢歲常大稔於是眾議就諸神殿前益以樓臺歲時伏臘藉爲演劇娛神之所維時勸捐集事則里民張名國正諸人也予自維忝莅斯邑以來愧遂生之道多有未盡而潛滋廣育所以補天地之憾而宏父母之德者於神實嘉賴焉則是祠之修也毋亦斯民樂生之心有鼓舞不自己者而煦嫗

培養凡所以厚厥民生以仰體神意者予其敢一日或忘也夫

李德林字修齋山東平度州人道光六年爲西平令課農桑興水利修城垣尤以興學育才爲己任嘗勸令紳富捐貲創辦義學四十一處凡貧寒子弟皆得就學同治十二年詔令入西平名宦祠德林有自撰創建義學碑文曰昔范文正公創建義學至今傳爲美談夫文正自教其鄉之子弟耳設統一邑之子弟而胥納之學其事之所可傳又當如何也西平地雖褊小俗尙質樸人敦禮讓余下車以來思皆進之以大道適上憲行文勸捐立義學因集邑之紳耆而諄諭之不數月或錢或房地

合計得一萬餘金共建學四十一所亟爲之招佃發商  
通詳備案以重公項擇董事總理租息出入按年報銷  
以裕經費其餘事件均有一定章程以期可久自是西  
邑中當無不向學之子弟矣夫樂善好施共成斯舉爾  
紳民之功也褒德揚芳俾垂不朽守土者之事也除請  
給獎勵外仍按保立石載明捐者姓名及錢地數目使  
後之人知是學所出來相與整頓而增捐之庶西邑義  
學他日亦附文正以傳豈不幸甚道光七年

李釗字勉齋臨漳人乙酉科拔貢朝考一等咸豐三年以  
七品小京官謫任西平訓導博學工文辭一時從游者  
成就甚多去後士林追念教澤爲立碑學宮以誌不忘

云

官國勳字子猷山東蓬萊人道光二十九年己酉科拔貢  
朝考二等咸豐十一年知西平時各鄉鎮團總恃強凌  
弱橫行閭里國勳下車後廉得其狀亟裁抑之各團總  
咸爲斂迹同治元年三月朔擒首張總愚股匪萬餘圍  
攻縣城國勳募壯士縋城出奇襲擊斬獲數十人初四  
日夜風雨大作賊潛渡城濠國勳偵知設伏比蟻附城  
垣槍礮並發賊披靡翌日解圍去嗣復就城之四隅增  
築礮樓以防後患輿論建之

杜傑魁字卓峯湖北竹山人舉人同治七年及十一二年  
閒兩任西平縣事文學優長政尙清簡嘗創建試院增

築柏亭南橋士民咸愛戴之沒後有爲鄒陵縣城隍神  
之說傑魁曾於同治十一年十月爲權察陳霞樵亦園  
詩集作序文曰詩之一道自古名作如林近日專工賦  
帖古體雜作講求甚妙西邑陳公霞樵先生素工詩名  
噪一時耳熟久矣恨無由見其詩也同治戊辰予宰是  
邑因公過亦園見其月榭風亭奇花名草布置如法備  
極雅人深致晤少君春帆二兄丰姿瀟灑知得於詩教  
者深矣壬申秋予次子元勳謬膺選拔春帆來賀袖出  
亦園詩集稱係先生手澤計二百首囑爲評閱予素不  
工詩且公務煩冗未暇披覽適值扃門科考四少君春  
芳應童子試亭亭玉立拔列前茅尤幸詩人有後克繼

書香爲嘆賞者久之試竣回署退食之暇細讀詩冊其  
觸景抒吟也天懷超邁其憶友題咏也情致纏綿其隨  
事寄興也胸襟豁達眾美兼賅未可弗傳况遭兵燹散  
帙無存幸高蓮叔司馬尙留二冊兼從灰燼之餘各處  
搜羅始足二百首可見先生精神所注默爲呵護不啻  
碩果之留豈忍湮沒哉爰繕愿付梓公諸同好以不掩  
先生之善而成春帆之志也

李待時字珍聘直隸永平人舉人光緒二年爲西平令饒  
幹略實心任事有悍匪名歪爪虎者橫行一方人皆苦  
之待時偵悉其巢躬往掩捕賊覺踰牆遁持銅錘追奪  
之聽訟片言立決案無留牘暇輒下鄉訪民疾苦遇

者卽於田間或道旁樹下訊斷罔不折服會私鑄風熾  
錢小如鷹眼訟獄繁興閭閻騷然待時厲行禁止未三  
月而風息又振興文教禁種罌粟疏渠治蝗蒞任暮年  
民間夜不閉戶一時有清官第一之稱

楊溶字硯農福建閩縣人庚辰科進士光緒十年宰西平  
聽斷明允民無冤抑每月以文課士躬自評閱並捐俸  
加重膏獎文風丕變去任後士林猶追思不置

李名燠字石州廣東東莞人也光緒十四年知西平縣事  
名燠秉性廉明持躬儉約邑無擾累嘗設鋸筓以探民  
隱立稟規以防衙蠹民咸德之

華薰字友于順天大興人原籍浙江山陰光緒十六年知



西平時境內洪河頻年潰決爲患幘頭灣決口尤巨屢塞屢潰至規度形勢親臨河干督工防築一日工甫竣水又暴至新隄被刷其下忽穿一洞激流如湍眾駭然罔知所措蔡見勢危急和衣冠立當其衝誓以身殉于是人人感奮無不負土競塞患立平事後鄉民卽其處築臺誌之名曰華公臺蔡又以柏亭永濟合水諸橋矮而狹行旅病涉悉改築之並增建潞陽河橋

左輔字素儲湖南長沙人光緒二十三年丁酉莅西平任精幹有吏材聽斷明決判牘敏捷下筆千百言當堂立就月必課士給獎文風丕振復旌孝行懲豪暴整保甲辦災賑理義塾固河防百廢俱興邑當南北要衝庚子

聯軍內犯兵差絡繹壬寅京漢路洋工程師勘地興工  
交涉繁多輔皆應付裕如民無擾累先是洋工程師李  
嘉和創建洪河鐵橋因水流妨礙工作於橋旁濬一引  
河當時沿河居民慮水漲隄潰阻其濬引嘉和不聽未  
幾水果大至河決成災眾大怒頃刻嘯聚數千人聲稱  
非將嘉和投河塞流不可輔聞馳往排解並允罰施工  
頭出銀三千兩振災事始解其應變敏決類如此輔在  
任八年大府以卓異薦遷淮寧令去之日士民空巷送  
之輔著重修東嶽廟碑記文曰子宰西邑之七年天下  
承平差徭不驚雨暘時若歲大有民氣和樂訟簡刑清  
人情居逸思勞有所興作羣請於子曰公撫是邦淬厲

其精神爲吾儕圖樂利事有益民不避艱難毅然爲之  
善政固不勝舉卽下至頽庵破廟視力所能舉亦多集  
款興修然邑人情而吝不關已恆膜然置之而比年不  
登人各自爲謀公雖獨提倡於上而城郊古刹之荒廢  
者如故若東關之東嶽廟寶巖諸寺其尤著者每當冬  
春之交迎芒耕藉咸在於斯而士女亦羣相嬉游以暢  
其湮鬱顧頽垣廢瓦滿目藜蕪非所以壯觀瞻也况爲  
南北銜冠蓋相屬而不葺行旅將目笑之今歲幸有秋  
家給人足公盍倡之吾民願竭財力從公後以彌此缺  
于維古者以神道設教雖非政本亦藉是可警愚頽刳  
民欲不可拂因而修復亦甚盛事遂首捐俸並屬注把

總慶瀾劉教諭西川楊訓導永亮董其役書簿散之二十  
十一保隨緣募捐樂善好施之士慨然出資以觀厥成  
農事既畢庀材鳩工卑者崇之傾者植之廢者舉之無  
者增益之黑白之漫漶不鮮者剝落而更新之歲之十  
月工乃竣計共費緡錢二千一百一十六貫成廟室六  
十間又追還廟田一百八畝議歲收之二養僧道留其  
一儲以爲歲修一勞永逸皆大歡喜紳民復請爲之記  
因略述端末以示後來捐款姓字廟田坐落併刊碑左  
王錫侯字子蕃號葆源新鄉人同治庚午科舉人光緒十  
二年爲西平教諭主文城書院講席以性理學教士子  
殷殷不倦復佐邑令左輔整頓義學舉辦保甲成績燦

然其後河南巡撫裕長學政朱福詵林開謩累疏奏保  
陞遷廣西天河縣知縣

張鳳岐字鳴周長葛人附貢生光緒三十年任西平教諭  
慈祥明決操守耿介三十二年春仁義會匪苗金聲等  
作亂鳳岐佐縣官守城歷八十六日晝夜罔懈城賴以  
全迨亂平大府主窮治會黨鳳岐恐累及良民數數微  
服出外訪查分別涇渭保全甚多三十三年夏偕勸學  
總董陳銘鑑周歷全境調查義塾及廟產所至爲士民  
僧道講解興學要旨娓娓不倦尤崇尚節孝凡有依例  
請旌者必立予轉詳並嚴禁書斗需索規費

程嘉穀字善丞湖北麻城人光緒三十三年爲西平宰波

汲求治辦事熱心一時如縣城內勸學所師範傳習所  
地方公款所警察教練所圖書便買室城外農業試驗  
場皆嘉穀創立而地方公款所一切規章悉經手訂尤  
爲當道所嘉許並通飭各州縣仿行至今尙沿爲定制  
云

朱名炤字潛齋山東平陰人翰林院庶吉士散館授知縣  
宣統三年知西平興學理獄保商惠工諸事均盡心爲  
之會武漢事起客軍雲集土匪竊發名炤設守望辦團  
練支應客軍餉糈閩境無擾壬子夏大霖雨洪河暴漲  
城北王店隄將潰名炤督兩立河干督工搶險並親自  
負土堵塞卒慶安瀾

中華民國

洪壽昌字季涵湖北漢陽人附貢民國六年爲西平縣知事通達吏治勤求民隱聽斷平恕民無冤獄復以教育爲立國根本蠲除陋規釐剔中飽增籌小學經常費兩萬餘貫實民國以來第一賢吏也

周德宣字伯猷河南商城人光緒壬寅科舉人民國十一年春正月爲西平縣知事其夏四月豫督趙倜與馮玉祥軍戰於鄭州敗績倜弟儁率汝南巡緝隊遁歸過境索供億德宣應付裕如未幾倜敗耗聞鄰邑駐軍多譁變恣掠縣內巡緝隊長葉某及防軍營長裴某均內不自安部下亦蠢蠢欲動德宣偵知之極力撫循地方賴

以寧謚事平河南省長張鳳臺嘉其勞勩調任修武士  
民空巷送之



西平縣志卷二十一終

西平縣志卷二十二 文獻志 人物篇一

鄧惲列傳一

子壽附

范曄後漢書

鄧惲字君章汝南西平人也年十二失母居喪過禮及長理韓詩嚴氏春秋明天文歷數王莽時寇賊羣發惲迺仰占玄象歎謂友人曰方今鎮歲熒惑並在漢分翼軫之域去而復來漢必再受命福歸有德如有順天發策者必成大功時左隊大夫遂並素好士惲說之曰當今上天垂象智者以昌愚者以亡昔伊尹自鬻輔商立功全人惲竊不遜敢希伊尹之蹤應天人之變明府儻不疑逆俾成天德並奇之使署爲吏惲不謁曰昔文王拔呂尙於渭濱高宗禮傳說於巖築桓公取管仲於射鉤故能立弘烈就元勳

未聞師相仲父而可爲吏位也非闕天者不可與圖遠君  
不授驥以重任驥亦俛首裹足而去耳遂不受署西至長  
安迺上書王莽曰臣聞天地重其人惜其物故運機衡垂  
日月含元包一甄陶品類顯表紀世圖錄豫設漢歷久長  
孔爲赤制不使愚惑殘人亂時智者順以成德愚者逆以  
取害神器有命不可虛獲上天垂戒欲悟陛下令就臣位  
轉禍爲福劉氏享天永命陛下順節盛衰取之以天還之  
以天可謂知命矣若不早圖是不免於竊位也且堯舜不  
以天顯自與故禪天下陛下何貪非天顯以自累也天爲  
陛下嚴父臣爲陛下孝子父教不可廢子諫不可拒惟陛  
下留神莽大怒卽收繫詔獄劾以大逆猶以憚據經讖難

卽害之使黃門近臣脅惲令自告狂病恍惚不覺所言惲  
適瞋目晉曰所陳皆天文聖意非狂人所能造遂繫須冬  
會赦得出適與同郡鄭敬南適蒼梧建武三年又至廬江  
因遇積弩將軍傅俊東徇揚州俊素聞惲名適禮請之上  
爲將兵長史授以軍政惲適誓眾曰無掩人不備窮人於  
厄不得斷人支體裸人形骸放淫婦女俊軍士猶發冢陳  
尸掠奪百姓惲諫俊曰昔文王不忍露白骨武王不以天  
下易一人之命故能獲天地之應剋商如林之旅將軍如  
何不師法文王而犯逆天地之禁多傷人害物虐及枯尸  
取罪神明今不謝天改政無以全命願將軍親率士卒收  
傷葬死哭所殘暴以明非將軍本意也從之百姓悅服所

向皆下七年俊還京師而上論之惲恥以軍功取位遂辭歸鄉里縣令卑身崇禮請以爲門下掾惲友人董子張者父先爲鄉人所害及子張病將終惲往候之子張垂歿視惲歔歔不能言惲曰吾知子不悲天命而痛讐不復也子在吾憂而不手子亡吾手而不憂也子張但目擊而已惲卽起將客遮仇人取其頭以示子張子張見而氣絕惲因而詣縣以狀自首令應之遲惲曰爲友報讐吏之私也奉法不阿君之義也虜君以生非臣節也趨出就獄令跪而追惲不及遂自至獄令拔刀自向以裏惲曰子不從我出敢以死明心惲得此迺出因病去久之太守歐陽歙請爲功曹汝南舊俗十月享會百里內縣皆齋牛酒到府譙飲

時臨享禮訖歛教曰西部督郵繇延天資忠貞稟性公方  
摧破姦凶不嚴而理今與眾儒共論延功顯之於朝太守  
敬嘉厥休牛酒養德主簿讀書教戶曹引延受賜憚於下  
坐愀然前曰司正舉觥以君之罪告謝於天按延資性貪  
邪外方內員朋黨構姦罔上害人所在荒亂怨惡並作明  
府以惡爲善股肱以直從曲此旣無君又復無臣憚敢再  
拜奉觥歛色慙動不知所言門下掾鄭敬進曰君明臣直  
功曹言切明府德也可無受觥哉歛意少解曰實歛罪也  
敬奉觥憚迺免冠謝曰昔虞舜輔堯四罪咸服讒言弗庸  
孔任不行故能作股肱帝用有歌憚不忠孔任是昭豺虎  
從政旣陷誹謗又露所言罪莫重焉請收憚延以明好惡

欵曰是重吾過也遂不譙而罷惲歸府稱病延亦自退鄭敬素與惲厚見其言忤欵迺相招去曰子廷爭繇延君猶不納延今雖去其執必還直心無諱誠三代之道然道不同者不相爲謀吾不能忍見子有不容君之危盍去之乎惲曰孟軻以彊其君之所不能爲忠量其君之所不能爲賊惲業已彊之矣障君於朝既有其直而不死職罪也延退而惲又去不可敬迺獨隱於弋陽山中居數月欵果復召延惲於是迺去從敬止漁釣自娛留數十日惲志在從政既迺喟然而歎謂敬曰天生俊士以爲人也鳥獸不可與同羣子從我爲伊呂乎將爲巢許乎而父老堯舜也敬曰吾足矣初從生步重華於南野謂來歸爲松子今幸得

全軀樹類還奉墳墓盡學問道雖不從政施之有政是亦  
爲政也吾年耄矣安得從子子勉正性命勿勞神以害生  
憚於是告別而去敬字次都清志高世光武連徵不到憚  
遂客居江夏教授郡舉孝廉爲上東城門候帝常出獵車  
駕夜還憚拒關不開帝令從者見面於門問憚曰火明遠  
遠遂不受詔帝迺迴從東中門入明日憚上書諫曰昔文  
王不敢繫于游田以萬人爲憂而陛下遠獵山林夜以繼  
晷其如社稷宗廟何暴虎馮河未至之戒誠小臣所竊憂  
也書奏賜布百匹貶東中門候爲參封尉後令憚授皇太  
子韓詩侍講殿中及郭皇后廢憚迺言於帝曰臣聞夫婦  
之好父不能得之於子況臣能得之於君乎是臣所不敢



言雖然願陛下念其可否之計無令天下有議社稷而已  
帝曰憚善恕己量主知我必不有所左右而輕天下也后  
既廢而太子意不自安憚迺說太子曰久處疑位上違孝  
道下近危殆昔高宗明君吉甫賢臣及有繼介放逐孝子  
春秋之義母以子貴太子宜因左右及諸皇子引愆退身  
奉養母氏以明聖教不背所生太子從之帝竟聽許憚再  
遷長沙太守先是長沙有孝子古初遭父喪未葬鄰人失  
火初匍匐樞上以身扞火火爲之滅憚甄異之以爲首舉  
後坐事左轉芒長又免歸避地教授著書八篇以病卒子

壽

壽字伯孝善文章以廉能稱舉孝廉稍遷冀州刺史時歲

部屬郡多封諸王賓客放縱類不檢飾壽案察之無所容  
貸適使部從事專住王國又徒督郵舍王宮外動靜失得  
卽時騎驛言上奏王罪及劾傅相於是藩國畏懼並爲遵  
節視事三年冀土肅清三遷尙書令朝廷每有疑議常獨  
進見肅宗奇其智策擢爲京兆尹郡多強豪姦暴不禁三  
輔素聞壽在冀州皆懷震竦各相檢勅莫敢干犯壽雖威  
嚴而推誠下吏皆願效死莫有欺者以公事免復徵爲尙  
書僕射是時大將軍竇憲以外戚之寵威傾天下憲嘗使  
門生齎書詣壽有所請託壽卽送詔獄前後上書陳憲驕  
恣引王莽以誠國家是時憲征匈奴海內供其役費而憲  
及其弟篤景並起第宅驕奢非法百姓苦之壽以府藏空

虛軍旅未休遂因朝會譏刺憲等厲音正色辭旨甚切憲怒陷壽以買公田誹謗下吏當誅侍御史何敞上疏理之曰臣聞聖王闢四門開四聰延直言之路下不諱之詔立敢諫之旗聽歌謠於路爭臣七人以自鑒照考知政理違失人心輒改更之故天人並應傳福無窮臣伏見尙書僕射邳壽坐於臺上與諸尙書論擊匈奴言議過差及上書請買公田遂繫獄考劾大不敬臣愚以爲壽機密近臣匡救爲職若懷默不言其罪當誅今壽違眾正議以安宗廟豈其私邪又臺閣平事分爭可否雖唐虞之隆三代之盛猶謂諤諤以昌不以誹謗爲罪請買公田人情細過可裁隱忍壽若被誅臣恐天下以爲國家橫罪忠直賊傷和氣

忤逆陰陽臣所以敢犯嚴威不避夷滅獨死誓言非爲壽也忠臣盡節以死爲歸臣雖不知壽度其甘心安之誠不欲聖朝行誹謗之誅以傷塞晏之化杜塞忠直垂譏無窮臣敞謬豫機密言所不宜罪名明白當填牢獄先壽僇仆萬死有餘書奏壽得減死論徙合浦未行自殺家屬得歸鄉里

贊曰邳惲譏莽竊位收繫詔獄而不易其辭光武獵還拒關極諫眞強毅鯁直之臣哉郭后母子雖被廢黜俱獲令終惲處帝后父子之間維護調停用心良苦而積誠所感無物不動光武東海言納計從其所保全者大矣壽治尙嚴肅約束豪暴劾憲論徙義弗受辱猶有乃翁堅彊不撓

之風焉

李咸列傳二

陳銘鑑輯

李咸字元貞一字元卓汝南西平人也孤特自立家貧母老常躬耕稼以奉養學魯詩春秋公羊傳三禮三府竝辟司徒胡廣舉茂才除高密令政多奇異以廉幹知名青州表其狀建寧四年三月自太僕拜太尉熹平元年寶太后崩太后本遷南宮雲臺宦者積怨寶氏遂以衣車載后尸置城南市舍數日中常侍曹節王甫欲用貴人禮殯帝曰太后親立朕躬統承大業詩云無德不報無言不酬豈宜以貴人終乎於是發喪成禮及將葬節等復欲別葬太后而以馮貴人配祔詔公卿大會朝堂令中常侍趙忠監議

咸時病乃扶輿而起擣椒自隨謂妻子曰若皇太后不得配食桓帝吾不生還矣既議坐者數百人各瞻望中官良久莫肯先言趙忠曰議當時定怪公卿以下各相願望廷尉陳球曰皇太后以盛德良家母臨天下宜配先帝是無所疑忠笑而言曰陳廷尉宜便操筆球卽下議曰皇太后自在椒房有聰明母儀之德遭時不造援立聖明承繼宗廟功烈至重先帝晏駕因遇大獄遷居空宮不幸早世家雖獲罪事非太后今若別葬誠失天下之望且馮貴人冢墓被發骸骨暴露與賊竝尸魂靈汙染且無功於國何宜上配至尊忠省球議作色俛仰蚩球曰陳廷尉建此議甚健球曰陳寶旣冤皇太后無故幽閉臣常痛心天下憤歎

今日言之退而受罪宿昔之願公卿以下皆從球議咸始不敢先發見球辭正然後大言曰臣本謂宜爾誠與臣意合會者皆爲之愧曹節王甫復爭以爲梁后家犯惡逆別葬懿陵武帝黜廢衛后而以李夫人配食今竇氏罪深豈得合葬先帝乎咸乃詣闕上疏曰臣伏維章德竇后虐害恭懷安思閔后家犯惡逆而和帝無異葬之議順朝無貶降之文至於衛后孝武皇帝身所廢棄不可以爲比今長樂太后尊號在身親嘗稱制坤育天下且援立聖明光隆皇祚太后以陛下爲子陛下豈得不以太后爲母子無黜母臣無貶君宜合葬宣陵一如舊制帝省奏謂曹節等曰竇氏雖爲不道而太后有德於朕不宜降黜節等無復言

於是議者乃定咸自在相位約身率下常食脫粟飯醬菜而已不與州郡交通刺史二千石牋記非公事不發省在朝清忠權倖憚之熹平二年三月免以老乞骸骨見許悉還所賜物乘敝牛車使子男御晨發京師百僚追送盈塗不能得見家舊貧狹庇蔭草廬卒蔡邕碑記以爲補袞闕敘彝倫天人交格始終無疵雖元凱翼虞周召輔姬未之或踰也

贊曰東漢季世閭寺弄權陵躒百官李咸獨不避菑害抗疏直言卒使節甫奪氣正義獲伸深得大臣之體蔡中郎謂其補袞闕敘彝倫天人交格始終無疵信哉

按范曄後漢書無李

咸列傳此傳乃節錄范書李靈帝紀胡廣陳球列傳及謝承後漢書纂組而成均係根據原文並未竄易一字也銘



伍孚列傳三

謝承後漢書

伍孚字德瑜汝南人少有大節爲郡門下書佐其本邑長  
有罪太守使孚出教敕曹下督郵收之孚不肯受教伏地  
仰諫曰君雖不君臣不可不臣明府奈何令孚受教勅外  
收本邑長乎乞更授他吏太守奇而聽之後大將軍何進  
避爲東曹屬稍遷侍中河南尹越騎校尉董卓作亂百僚  
震慄孚著小鎧於朝服裏挾佩刀見卓欲伺便刺殺之語  
闕辭去卓送至閣中孚因出刀刺之卓多力退卻不中卽  
收孚卓曰卿欲反邪孚大言曰汝非吾君吾非汝臣何反  
之有汝亂國篡主罪盈惡大今是吾死日故來誅姦賊耳

恨不車裂汝於市朝以謝天下遂殺孚

賈曰伍孚不肯受勅收本邑長而敢於刺卓非前怯而後  
勇乃明於君臣之分並知亂國篡主者之不容赦也雖齋

志以歿而正氣凜然足與西漢翟義張充比烈矣舊志伍孚事出

陳壽三國志增入按三國志董卓傳城門校尉伍瓊注引謝承後漢書載伍孚事一段如右傳所述他無所見舊志所據當係此也英雄記曰瓊字德瑜汝南人謝承記字及本郡與瓊同而致死事乃與孚異貳國志瓊字德瑜詳清一統志汝寧府人物伍字德瑜吳房人是又與謝承記所載孚之籍貫微有不同而乾隆閒休寧金氏所著遂平縣志明以前人物均略無可徵攷因將伍孚仍列入本志其舊說互異處并敘於此銘鑑附識

### 和洽列傳四

陳壽魏志

和洽字陽士汝南西平人也舉孝廉大將軍辟皆不就袁

紹在冀州遣使迎汝南士大夫洽獨以冀州士平民彊英  
桀所利四戰之地本初乘資雖能彊大然雄豪四起全未  
可必也荊州劉表無他遠志愛人樂士土地險阻山夷民  
弱易依倚也遂與親舊俱南從表表以上賓待之洽曰所  
以不從本初辟爭地也昏世之主不可親近久而阽危必  
有讒慝聞其中者遂南度武陵太祖定荊州辟爲丞相掾  
屬時毛玠崔琰並以忠清幹事其選用先尙儉節洽言曰  
天下大器在位與人不可以一節儉也儉素過中自以處  
身則可以此節格物所失或多今朝廷之議吏有著新衣  
乘好車者謂之不清長吏過營形容不飾衣裘敝壞者謂  
之廉潔至令士大夫故汙辱其衣藏其輿服朝府大吏或

自擊壺餐以入官寺夫立教觀俗貴處中庸爲可繼也今  
崇一概難堪之行以檢殊塗勉而爲之必有疲瘁古之大  
教務在通人情而已凡激詭之行則容隱僞矣魏國旣建  
爲侍中後有白毛玠誦毀太祖太祖見近臣怒甚洽陳玠  
素行有本求案實其事罷朝太祖令曰今言事者白玠不  
但謗吾也乃復爲崔琰觖望此損君臣恩義妾爲死友怨  
歎殆不可忍也普蕭曹與高祖並起微賤致功立勳高祖  
每在屈笮二相恭順臣道益彰所以祚及後世也和侍中  
比求實之所以不聽欲重參之耳洽對曰如言事者言玠  
罪過深重非天地所覆載臣非敢曲理玠以枉大倫也以  
玠出羣吏之中特見拔擢顯在首職歷年荷寵剛直忠公

爲眾所憚不宜有此然人情難保要宜考覈兩驗其實今  
聖恩垂含垢之仁不忍致之于理更使曲直之分不明疑  
自近始太祖曰所以不考欲兩全玠及言事者耳洽對曰  
玠信有謗主之言當肆之市朝若玠無此言事者加誣大  
臣以誤主聽二者不加檢覈臣竊不安太祖曰方有軍事  
安可受人言便考之邪狐射姑刺陽處父於朝此爲君之  
誠也太祖克張魯洽陳便宜以時拔軍徙民可省置守之  
費太祖未納其後竟徙民棄漢中出爲郎中令文帝踐阼  
爲光祿勳封安城亭侯明帝卽位進封西陵鄉侯邑二百  
戶太和中散騎常侍高堂隆奏時風不至而有休廢之氣  
必有司不勤職事以失天常也詔書謙虛引咎博諮異同

治以爲民稀耕少浮食者多國以民爲本民以穀爲命故  
賈一時之農則失育命之本是以先王務蠲煩費以專耕  
農自春夏以來民窮於役農業有廢百姓囂然時風不至  
未必不由此也消復之術莫大於節儉太祖建立洪業奉  
師徒之費供軍賞之用吏士豐於資食倉府衍於穀帛由  
不飾無用之宮絕浮華之費方今之要固在息省勞煩之  
役損除他餘之務以爲軍戎之儲三邊守禦宜在備豫料  
賊虛實蓄士養眾算廟勝之策明攻取之謀詳詢眾庶以  
求厥中若謀不素定輕弱小敵軍人數舉舉而無庸所謂  
悅武無震古人之誠也轉爲太常清貧守約至賣田宅以  
自給明帝聞之加賜穀帛堯諡曰簡侯子禽嗣禽弟適才

爽開濟官至廷尉吏部尚書洽同郡許混者許劭子也清醇有鑒識明帝時爲尚書

贊曰和洽建言陳策皆洞中窾要歷仕三朝清貧自守其人之風節可知也諡曰簡侯宜哉

和嶠列傳五

唐太宗晉書

和嶠字長輿汝南西平人也祖洽魏尚書令父道

三國魏志和洽

傳作適

魏吏部尚書嶠少有風格慕舅夏侯玄之爲人厚自

崇重有盛名于世朝野許其能整風俗理人倫襲父爵上蔡伯起家太子舍人累遷潁川太守爲政清簡甚得百姓歡心太傅從事中郎庾嶺見而歎曰嶠森森如千丈松巖礫多節目施之大廈有棟梁之用賈充亦重之稱於武

帝入爲給事黃門侍郎遷中書令帝深器遇之舊監令共  
車入朝時荀勗爲監嶠鄙勗爲人以意氣加之每同乘高  
抗專車而坐乃使監令異車自嶠始也吳平以參謀議功  
賜弟郁爵汝南亭侯嶠轉侍中愈被親禮與任顓張華相  
善嶠見太子不令因侍坐曰皇太子有淳古之風而季世  
多僞恐不了陛下家事帝默然不答後與荀顓荀勗同侍  
帝曰太子近入朝差長進卿可俱詣之粗及世事旣奉詔  
而還顓勗並稱太子明識弘雅誠如明詔嶠曰聖質如初  
耳帝不悅而起嶠退居恆懷慨歎知不見用猶不能已在  
御坐言及社稷未嘗不以儲君爲憂帝知其言忠每不酬  
和後與嶠語不及來事或以告買妃妃銜之太康末爲尙



書以母憂去職及惠帝卽位拜太子太傅加散騎常侍光祿大夫太子朝西宮嶠從入賈后使帝問嶠曰卿昔謂我不了家事今日定云何嶠曰臣昔事先帝曾有斯言言之不效國之禍也臣敢逃其罪乎元康二年卒贈金紫光祿大夫加金章紫綬本位如前永康初策諡曰簡嶠家產豐富擬于王者然性至吝以是獲譏於世杜預以爲嶠有錢癖以弟郁子濟嗣位至中書郎郁字仲輿才望不及嶠而以清幹稱歷尙書左右僕射中書令尙書令洛陽傾沒奔于苟晞疾卒

贊曰和嶠預識惠帝不勝重任力主易儲非古所謂社稷之臣而何向使武帝毅然聽從擇賢而立則賈后入王之

禍度能銷弭胡人無隙可乘懷愍之辱奚自來乎惜嶠議不行晉未再傳而亂斯作矣邦之興喪基於一言有國者其知所鑒戒哉

梅頤列傳六

陳銘鑑輯

梅頤字仲真汝南西平人少好學隱退而求實進止領軍司馬後爲豫章太守嘗有惠於陶公有事王丞相導遣收之侃曰天子富於春秋萬機自諸侯出王公旣得錄陶公何爲不可放乃遣人於江口奪之頤見陶公拜陶公止之頤曰梅仲真勅明日豈可復屈耶弟陶仕至尙書

贊曰梅頤屈却陶公爲其免己於難也人當生死患難之際真情最易流露豈容矯飾哉然東晉人物大率類是卽

此可以概其餘已

按唐太宗晉書不載梅頤事舊志云梅頤出晉書增入其有無依據不可知也

此傳乃根據宋劉義慶世說新語及晉諸公贊纂輯而成又按隋書經籍志漢孔安國奉詔爲古文尚書五十八篇作傳會巫蠱事起未得奏上至東晉豫章內史梅賾始得安國之傳奏之於是始列國學太原閻若璩氏尚書古文疏證謂東晉元帝時豫章內史梅賾所上古文尚書增多二十五篇爲賾偽造而元和惠棟氏古文尚書考謂梅頤之書非壁中之文繇是言之則梅賾梅頤實係一人而二名也惟世說新語頤爲豫章太守經籍志頤爲豫章內史其官名又微有不

同耳銘鑑附識

### 梅陶列傳七

陳銘鑑輯

梅陶字叔真汝南西平人居鄉里立月旦評光祿大夫祖納問之陶曰善褒惡貶佳法也納曰未益時王隱在坐因曰尙書稱三載考績三考黜陟幽明何得一月便行褒貶陶曰此官法也月旦私法也隱曰曷稱積善之家必有餘

慶積不善之家必有餘殃稱家者豈不是官必須積久善  
惡乃著公私何異古人有言貞良而亡先人之殃酷烈而  
存先人之勳累世乃著豈但一月若必月且則顏回食埃  
不免貪污盜蹠引少則爲清廉朝種暮穫善惡未定矣時  
陶及鍾雅數說餘事納輒困之因曰君汝穎之士利如錐  
我幽冀之士鈍如槌持我鈍槌捶君利錐皆當摧矣陶雅  
並稱有神錐不可得槌納曰假有神錐必有神槌陶雅無  
以對其後陶爲大將軍王敦諮議參軍敦深忌陶侃功侃  
將還江陵欲詣敦別皇甫方回及朱伺等諫以爲不可侃  
不從敦果留侃不遣左轉廣州刺史平越中郎將以王廙  
爲荊州侃之佐吏將士鄭攀等詣敦請留侃敦怒不許被

甲持矛將殺侃出而復回者數四侃正色曰使君雄斷當  
裁天下何此不決乎因起如廁陶及長史陳頌言於敦曰  
周訪與侃親姻如左右手安有斷人左手而右手不應者  
乎敦意遂解於是設盛饌餞之侃便夜發敦引其子瞻爲  
參軍侃既達豫章見周訪流涕曰非卿外援我殆不免元  
帝時廷尉衛展請復肉刑詔內外通議陶及王導賀循紀  
瞻庾亮張嶷等議以爲復之便帝欲從展請以王敦諫乃  
止咸和中陶侃都督江州領刺史因移鎮武昌表論梅陶  
爲其有德於己故陶嘗與親人曹識書曰陶公機神明鑒  
似魏武忠順勤勞似孔明陸抗諸人不能及也明帝崩國  
喪未暮陶私奏女妓御史中丞鍾雅劾奏曰肅祖明皇帝

崩背聖主縞素泣血臨朝百寮慘愴動無歡容尙書梅陶  
無大臣忠慕之節家庭侈靡聲妓紛葩絲竹之音流聞衢  
路宜加放黜以整王憲請下司徒論正清議穆后臨朝特  
原不問

贊曰東晉人士風流放誕舉世披靡梅陶官至尙書不恤  
國喪雖被糾彈穆后竟置弗問紀綱陵替至此宜稱兵犯

闕者踵相接也於梅陶也何尤舊志云梅陶字叔真頤弟

增入按唐太宗晉書刑法志祖納陶侃鍾雅列傳均載梅  
陶事而不及梅頤且亦未明指陶爲何邑人惟劉孝標所

注世說新語方正篇謂梅頤字仲真汝南西平人頤弟陶  
字叔真見晉諸公贊而祖納傳稱梅陶鍾雅爲汝頤之士

雅頤川長社人自有傳雅既屬頤而陶必屬汝證以劉注  
世說則梅氏兄弟爲汝南西平人益復無疑矣

侯以族南梅氏世居自汝南西平人益復無疑矣  
梅氏以族南梅氏世居自汝南西平人益復無疑矣  
梅氏以族南梅氏世居自汝南西平人益復無疑矣

西平縣志 卷二十二 文獻 人物 五

軍今攷晉書陶仕至尙書不止如舊志所云爰採集晉書  
刑法志祖納陶侃鍾雅列傳及劉注世說新語之關於梅  
陶事蹟者編傳如右一字一句各有來歷  
蓋亦古人述而不作之意云爾銘鑑附識

和洪列傳八

魏徵隋書

和洪汝南人也少有武力勇烈過人周武帝時數從征伐  
以戰功累遷車騎大將軍儀同三司時龍州蠻任公忻李  
國立等聚眾爲亂刺史獨孤善不能禦朝議以洪有武略  
代善爲刺史月餘擒公忻國立皆斬首梟之餘黨悉平從  
帝攻河陰洪力戰陷其西門帝壯之賞物千段復從帝平  
齊進位上儀同賜爵北平侯邑八百戶拜左勳曹下大夫  
柱國王軌之擒吳明徹也洪有功焉加位開府遷折衝中  
大夫尉迥作亂相州以洪爲行軍總管從韋孝寬擊之軍

至河陽遇遣兵圍懷州洪與總管宇文述等擊走又破尉  
惇於武陟及平相州每戰有功拜柱國封廣武郡公邑二  
千戶前後賜物萬段奴婢五十口金銀各百挺牛馬百匹  
時東夏初平物情尙梗高祖以洪有威名令領冀州事甚  
得人和數歲徵入朝爲漕渠總管監轉拜泗州刺史屬突厥  
寇邊詔洪爲北道行軍總管擊走虜至磧而還後遷徐州  
總管卒時年六十四

贊曰和洪歷仕周隋兩朝均以武功顯而筦領冀州且得  
人和烏虜此豈易言哉

舊志人物類列隋和洪茲考隋書及北史和洪列傳均云洪汝南人

惟北史敘事不及隋書之詳故采錄隋書洪傳如右而附以說明於此銘鑑附識



西平縣志卷二十二終

西平縣志卷二十三 文獻志 人物篇二

徐理列傳九

陳銘鑑輯

徐理西平人洪武初從諸將定江左積官至永清中護衛  
指揮僉事改營州衛靖難師起聞成祖克大寧理與北平  
都指揮使陳亨指揮陳文等謀降燕夜二鼓襲劉眞營眞  
單騎走廣寧理等率眾降燕爲右軍副將從成祖南下與  
南軍戰於白溝河雄縣藁城悉破之成祖將襲滄州命理  
及陳旭潛於直沽造浮橋以濟師嗣定兩淮入金川門大  
小十餘戰皆賈勇先登所向克捷累進都指揮都督僉事  
壬午封武康伯賜白金文綺貂蟬冠服還守北平理馭下  
寬厚得士卒心永樂六年卒再傳至孫勇無子絕封

右傳係節

錄明史成祖本紀陳亨列傳及  
西平舊志徐理傳組織而成

贊曰燕師靖難舉兵以從建勛封爵識時之英

衡岳列傳十

衡岳字世瞻西平大堰保上里人先世家湖廣隨州明初  
父通遷西平母周氏洪武二十九年由郡學生員中河南  
鄉試遂升大學三十年詔國子監選諸生詣詹事府議事  
以岳所陳有裨時政擢廣東潮州府同知約己惠民自常  
祿外餽遺一無取建文四年遷陝西西安府知府其清操  
善政如在湖時尋以內艱去官服闋改慶陽益以清白自  
勵民愛如父母永樂十年朝覲至京師坐言事忤旨謫戍  
交趾慶陽西安二郡民千餘人詣闕請貸以終惠不報仁

宗嗣立下詔求賢監察御史袁錠鹽運使何士英指揮范智交章薦起爲南城縣知縣尋改知南豐祿薄不足養常於官舍種蔬自給家人或有愠色岳曰不猶愈於謫戍時耶正統四年五月秩滿入都欲乞休刑部侍郎何文淵薦於朝遂擢任桂林府知府越五載岳年已七十遂致仕歸景泰三年三月三日卒於家年八十有四配王氏子七孫八初岳守慶陽僚友諸婦會飲金鈿綺繡爛然而岳妻獨荆釵布裙旣罷頗不悅岳曰爾坐何處曰首席曰旣坐首席可謂尊且貴矣胡更較量服飾耶嗣由桂林告歸道荆湘偶值居停家兒被雷電擊死岳爲禱於天復蘇居停感極餽以金固辭弗受聞岳嗜酒乃密置金甕中詭曰此家

釀也聊以佐食岳舟行數日招侍從啟饗共飲得餽金數

日子孫賢何用遺金子孫不肖遺金奚爲遂投諸江成化

間河南按察使何喬新聞岳居官清廉特表其墓

墓在縣城南二

十里衝坡亦曰大堰灣

贊曰衡岳初以條陳時政擢用繼以言事忤旨謫戍豈太祖成祖御下寬嚴固有其不同者在耶岳服官時約己惠民民愛如父母觀於慶陽西安二郡民詣闕請貸之已事可以知之袁錠何文淵等先後疏薦有以哉至關於投金於江之事其所以詔示左右者隱然與漢疏廣論旨相通岳之識解度量洵可謂加人一等矣

于宣郭五常列傳十一

于宣字敷化號宏宇西平人成化二十年舉進士官兵科  
都給事中剛直敢言時中官馮寶擅權舉朝無敢議者宣  
譴陳其過上雖不聽而寶心憚之乃託吏一作禮部侍郎王

瓊致意曰與馮宦交驩良便富貴可長保宣正色曰一飲  
一啄皆小民膏脂我無功於朝廷受祿滋愧至若馮某恨  
不得寢食其皮肉寧肯與通款曲耶瓊悚然不敢復言明  
日宣卽劾瓊不職黜之寶由是銜宣益甚顧宣立朝忠正  
無可指摘尋以疾告歸篋中惟敝衣數襲圖籍數卷而已  
及寶敗朝廷始知宣忠欲大用會病卒聞者咸惜之祀鄉

賢

墓在縣城東  
八里徐莊北

郭五常字大經號汝涯先世爲山西交城人明永樂間有

譚子中者由交城遷西平卜居流堰河之陽尋又遷居縣城內北街子中生芳芳生宗廉制貢憲宗時任中城兵馬指揮孝宗朝曾奉旨討萬貴妃黨廉正有聲子八人五常其第五子也幼時讀書金剛寺年十六補諸生正德五年舉於鄉明年聯捷成進士授大理寺左評事十一年進級賜勅褒美十四年江彬導帝南巡五常與翰林院修撰舒芬等上疏極諫武宗怒廷杖四十罰跪午門五日賴金吾雷某賂內侍以酒代茶得不死復杖四十謫爲通政司知事嘉靖元年詔復原職恤刑陝西多所平反尋遷知山東萊州府事廉介自持會丁母憂歸萊人爲繪像於楊震洞內生祀之服闋補湖廣鄖陽府知府莅任年餘民和歲稔

嗣陞長蘆運使鄆人謳思爲立甘棠碑未幾擢爲山西行  
太僕寺卿時廷中權貴張璠桂萼屢諷五常附已不從十  
三年命往邊外督理馬政居邊凡九年屢奏奇績賞金幣  
二十二年入覲卒於京邸年六十次年甲辰春姪東扶櫬  
歸葬縣城西南三里郭家店妻毛氏爲同邑進士毛鳳來  
女蚤逝繼配雷氏生五子佃  
田蓋萬雷佃蓋均  
諸生田歲貢生五常嗜酒豪飲官鄭陽值元宵比戶置  
酒徧飲不醉過雁門關與諸將佐痛飲賦詩有引兵同上  
雁門關之句  
又嘗與賓朋縱飲松下眾客皆醉而五常獨否著有忠臣  
錄紹庭集明季毀於寇燹均不傳

贊曰宣以不附權闖託疾告歸五常以阻帝巡幸致被杖  
謫眞骨鯁直亮之臣哉使宣與五常果得大用於時必有



正言讜論輔翼朝廷乃宣屏歸鄉里五常投置邊陲均不克立朝獻替以盡其款款之忠傳所謂棄黃鐘而鳴瓦釜者此也吁可惜也哉

王誥列傳十二

王誥字公遇號棠谿西平王寨保下里老王莊人也祖清以歲貢官瀋陽經歷父志德官山東金鄉教諭嘉靖二年誥成進士授行人遷戶部郎中屬大同兵變擇廷臣有文武才者出守誥既受命遂單車就道計擒首亂兩人餘悉相機撫定邊鎮以安紀功者疏其勞詔蔭一子汝寧所世襲千戶補山東東昌府知府陞山東按察司副使晉山西布政司副使尋擢僉副御史巡撫甘肅抵任後練士馬增

城堡敵兵入犯擒斬番虜二百九十餘級受白金文綺之

賜累遷南京戶部右侍郎兵部左侍郎都察院右都御史

總督漕運兼撫淮南地方時值倭寇猖獗內外戒嚴隨疏

請旗牌節制兵馬提調浙直福湖九省軍務諸將用命江

淮以寧捷聞上復賜金幣獎勞有加未幾感疾卒年六十

有八上聞震悼賜祭葬如例

嘉靖三十七年歲次戊午冬十一月十九日壬辰皇帝遣

河南布政使司右參政李亨致祭其文曰爾德器闕深才

猷敏達早登甲第筮仕大行薦歷郎曹出知名郡累遷藩

臬擢任都臺甘肅巡撫功多斬獲晉參南戶載轉總漕督

理精勤國計攸賴剿除倭寇江北救寧委用方殷以疾長

逝訃音來上良用悼傷爰念往勞特加恩卹所著有河西

稿淮南奏議東隅集等書

墓在縣城西三十里汝河北岸

長子胤魯襲汝

寧所千戶尋陞本府守備

誥妻李氏謝氏子七人長胤魯襲世職次胤淇尋甸軍民府知

西平縣志 卷二十三 文獻 人 物

府胤柏武舉密雲守備隨父平倭寇與敵戰于淮安陣亡  
胤汝甘州後衛經歷胤汝禮部儒士胤漁臨漳訓導著有  
覺世集胤昆  
國子監學生

贊曰誥戡定大同兵變撫綏甘肅剿除倭寇厥功偉已而  
明史不爲立傳何哉雖然誥具文武才勳在國家自明嘉  
靖已來三百餘年西平人士猶時時稱道弗衰與垂名青  
史者果奚異哉

毛祥劉素李克敏列傳十三

毛祥西平義亭保毛家寨人父鵬霄以舉人官山西汾州  
知州死寇難母田氏祥正統四年成進士授湖廣京山知  
縣陞岳州府知府兩任皆九年楚民復詣闕奏留三年遷  
雲南布政司參政未莅任卒岳州京山俱祀名宦祠子二

長鳳鳴舉人官嶧山知縣次鳳來進士臨晉知縣

劉素字尙文西平城內西街人天順庚辰歲貢生初任北直故城縣丞陞青縣知縣頗有循聲大府以卓異薦奉勅褒嘉秩滿民復借留二載尋改知靈壽縣縣有大明川宜榛栗諸果木居民利之中官欲奪而收之素抗疏力爭事遂寢弘治十年卒年五十有四子二綬歲貢生綱諸生爲

朱崇王儀賓

墓在縣治西門外西北隅洪河東岸弘治十二年孟夏知縣和鵬爲撰立墓碑

李克敏字海望號湛寰西平坊廓保人也爲歲貢生李時

正子萬歷十九年舉於鄉明年聯捷成進士任眞定府推

官清正不阿尋改補西安有勢豪犯科暮夜餽黃金數百

克敏拒不受卒正其罪擢戶部主事歷郎中奉命清理糧

儲夙弊嗣出爲廬州府知府清惠特著士民立祠祀之歷  
江西副使右參政分守嶺北道嚴明慈愛吏民無不懷德  
畏威引疾歸卒祀鄉賢子三振麟蔭監生奮麟肥城主簿  
毓麟廩生克敏昆弟共七人俱入庠食廩毓麟學使陶望齡  
贈聯曰燕山五桂多二桂荀氏八龍讓一龍傳  
爲佳話繼室武氏以節婦稱  
墓在縣城西南三里郭家店

贊曰祥與克敏俱以進士官至參政而所至民愛去後留  
思素以縣令抗疏阻中官奪民利鯁直敢言豈非皆一時  
之循良哉若夫克敏暮夜卻金守法不阿尤足多焉

徐賈陳楊列傳十四

徐文英字景華西平常濟保人也爲龔武康伯爵徐勇從  
姪見鄭曉異  
姓諸侯傳成化二十三年進士仕至陝西苑馬寺少卿

正德六年冬霸州降寇趙鏐攻西平縣城時文英致仕里  
屬率鄉兵禦之失利遇害事聞贈太僕寺卿命有司立祠

祀之

墓在常濟保鄭樓寨  
西南香煙寺左側

賈得山西平人當霸寇攻城時得山率義士魏升薛思廉  
等三十六人開關迎戰射殺賊首白大王餘賊被傷者甚  
眾卒以眾寡懸殊不克闔家死之疏聞贈西平縣主簿命  
入祀忠節祠

陳紳西平廩生素以忠義大節自期不苟然諾霸寇攻城  
紳率閭學諸生詣縣官王佐陳大義誓以死守及城陷佐  
死紳猶率眾巷戰力竭死之

時有遂平人李斌亦與  
賊戰被執罵賊磔死祀忠

節祠

楊舉西平諸生霸寇既陷城下令曰凡生員投降者待以優禮舉恥之昂然不屈賊怒拽而殺之同時與難者生員徐固輪賊壽等共六十四人事聞俱從祀忠節祠

贊曰霸寇陷城一役西平士民捐軀殉難者甚多匪獨文英得山紳舉而已也惟是文英得山諸人或率鄉兵義士或以文弱諸生力抗強寇不屈不撓雖事終弗濟而英風壯節實足與日月爭光明代遇士較厚故忠義蔚爲風氣豈偶然哉

楊魏吳王夏楊列傳十五

楊士英西平恩貢官山西懷仁縣知縣廉能素著母老乞歸養崇禎九年八月二十七日流寇擾邑東鄉士英被執

賊令降士英不屈並大詈之遂遇害事聞祀鄉賢

士英媳王氏亦

烈婦表

魏芳西平人僥智略崇禎六年流寇渡河南侵將入境芳

與鄉人謀截擊之誓於眾曰古人言一夫舍命萬軍難當

諸君幸勿懼但戮力殺賊賊未必不死我手況有大兵尾

賊後我輩卽不勝兵至賊亦必奔矣及賊至儀封店

卽今儀封

鎮芳率眾禦之戰不利眾潰身被數槍而仆賊退子孫昇

至縣芳氣未絕猶聲言殺賊不置云

吳靜西平歲貢官曲阜訓導以年老歸林下崇禎間流寇

擾境靜遇之氣度偉如不少貶損賊持槍刺之大罵不絕

而死



王之棟西平諸生素以方正自持崇禎十五年流寇陷城  
之棟詣明倫堂偕妻默坐賊至縛之之棟大詈不屈與妻  
同日死

夏名文西平生員崇禎十五年流寇攻破縣城執名文問  
縣令所在不答賊怒殺之時諸生殉難者爲楊煌劉東井  
柳應星劉出奇杜子樞張所定任希孔任希尹劉漢英戴  
君恩胡和春郭世勳陳克謨耿拱樞吳鍾靈陳廉

共三十人

楊積石西平諸生崇禎十五年因父煌死流寇難卽從死

父側其妻衡氏自縊

僕范進寶亦殉主而死

贊曰明季流寇之禍烈矣士英以懷仁知縣乞養歸里屬  
賊遇害芳率鄉人禦寇被創靜以老儒遇賊弗撓是非邪

正之所在既已辨明則生死利害非所計也之棟名文積石諸生均以抗賊之故從容就義鄉聖所謂大丈夫威武不能屈者諸君子庶幾近之嗚呼壯哉

王訓張應軾列傳十六

訓姪胤祚附

王訓字蒙宇一字公迪西平王寨保下里老王莊人嘉靖七年舉於鄉品誼端正學問淵博歷官陝西郿縣白河知縣性慈祥每治獄施刑輒如疾痛之在身僚友有以過慈非政所宜告者訓卽日解組歸以啟迪後學爲己任著有王子集翰棠谿文編姪胤祚

胤祚字自安歲貢生官長葛訓導品端學博尤潛心於性理諸書多所闡發教人以胡安定成法爲依歸一時學者

多宗之

張應軾字蜀溪西平里仁保下里人歲貢醇篤孝友學宗濂洛執經問字者百餘人出其門者步履端方一望而知爲謹飭之士歷任湖廣黃岡蒲圻教諭岳州教授以闡明理學輔翼聖教爲依歸興起者率多名儒著有四書翼註歷代忠臣攷見聞紀略數十卷

贊曰訓以不忍施刑棄官授徒胤祚克承先志遵用湖州教授遺法應軾敷教著書闡明理學之數子者有功於鄉邑閒之文化豈淺鮮哉舊志厠訓與應軾於文學之列宜已

尹張徐李楊列傳十七

西平尹冕父聰官陝西參政冕補諸生性至孝母劉氏卒  
冕悲號幾絕廬於墓側朝夕哭奠形容枯槁墓傍產紫芝  
十六莖雙柳交幹而生慈烏營巢其上人以爲純孝所感  
父歿復廬墓三年成化十二年九月詔表其門閭

張文佐字良弼西平留冊保上里張灣人成化二十年進  
士歷官山西平陽府知府浙江糧儲道山東布政司左參  
政父淵邁疾文佐籲天乞代疾遂愈後淵卒徒跣哀號既  
絕而復甦及葬廬墓側手植松柏千餘株以哀勞感疾夜  
夢異人賜以藥方旣寤如方服之疾果瘳嗣居母喪亦廬  
墓三年墓左產靈芝二本色赤如鷄冠事聞詔旌其門

文佐墓在張灣

徐惟性西平縣城北關附郭人也隆慶二年母病惟性割股奉母病遂愈越三年母死哀毀骨立及葬命弟惟孝侍父家居己廬墓側廬止四木相倚上覆草數束冬大雪埋其廬嚴寒侵襲迄無恙郡守史公巡道沈公嘗微行至其廬與語大悅歎曰徐生容止樸野斷非文飾可比因給以金使養父

左使陳公亦給以金免其徭

巡撫王公聞之檄縣官命給墳

地二畝並永免其賦名曰孝友莊

莊在縣城北門外

李安西平人性剛而奉母婉順耕田數畝自給母病思肉遂割左股命妻烹進之母食而病愈鄉人以爲孝言於官旌資之未幾而有楊孝子事

楊勳西平仙侶保人母病思食肉羹勳聞李安割肉奉母

事效之煮羹進母母病亦愈

費曰冕與文佐惟性生事盡力居喪廬墓可謂孝矣文佐嘗至參政而天性未漓惟性家甚寒微而孺慕倍切彌覺其難能而可貴也至於李安楊勳刲股療親雖涉毀傷遺體之嫌而深愛竺孳不避刀俎要亦未易偽爲也是豈得目爲愚孝而少之哉

宋趙二張列傳十八

宋自勉字懋建西平新豐保人性醇樸勤耕植家裕而好義萬歷二十一年歲凶民多餓死自勉蠲糧五百石施振全活甚眾後以吏員歷任紫陽五臺典史克盡厥職壽九十有八子繼顏字亞夫官襄陽稅課大使萬歷三十三年

六月山西商人賈自明過劉家橋涉水失銀六百兩自明情急欲投水死繼顏聞而亟止之卽命漁人網出悉還之子光偉歲貢生

趙鑑西平儀封鎮人務農好義值歲大饑鑑自請於官蠲穀四百石煮粥施濟全活甚多又捐資建社學延明師以教鄉里之俊秀者一時成就頗多萬歷閒徵爲義官沒後入鄉賢祠子鳳騰國子監貢生鳳陽恩貢生官太原府通判

張伯楠西平人御史張觀之孫也耆學孝友兄伯梅卒遺孤狝斗二歲撫育成入及分產厚給之長兄伯松子大化殤遺孤定年十二爲繼母所苦伯楠爲之析居各如其分

歲饑人相食輸穀施粥並捐地三畝以爲義塚時人多之  
邑令黃公旌其門

張德惠一名緒西平安撫保上里湯買趙村人也崇禎閒  
信陽某囊鉅金赴都求官道經縣西洪河畔遺囊於地某  
不之覺竟去適德惠出遊河干見而挾之歸祕藏之未以  
語人而時時留心物色失主一日德惠遇一客徘徊河上  
久之已而頓足嘆曰吾窮於此矣德惠意客必爲失金者  
邀至家問所來亟出囊示之曰是若物耶曰然曰請持去  
客大喜乃分金之半爲德惠壽謝曰與其受餽何若自始  
不言之爲愈乎固辭弗受客益歎服及德惠旣沒客爲築  
拾金不昧塔於墓前



贊曰自勉鑑燭穀振災義行著於鄉里繼顏救人之急伯  
楠撫兄之孤德惠臨財勿苟皆義行也至鑑捐資設學延  
明師以教鄉之俊秀實開西平義塾先河以務農之夫而  
具此卓識豈非庸中佼佼者乎

二宋趙劉列傳十九

宋光榮西平崇教保人也諸生崇禎十三年流寇掠寧陵  
縣張姓少女過西平境時爲專探鎮鄉勇周秉心截獲女  
貌美秉心欲收爲妾女堅執不從光榮爲捐十金贖之並  
送女歸原籍

宋光灼諸生與光榮同保里崇禎十三年大饑遇西華生  
員張宏聲攜妻女逃荒過境光灼憐而衣食之及宏聲死

寇難光灼乃送其妻女還鄉時人義之

趙鑠西平人幼好學數奇弗售躬耕能急人之難設塾延師以教貧家子弟不取償疫作死者踵相接鑠通醫理煮藥施舍活者甚眾並置防疫藥品於井中

劉學詩西平人性慈善好施予歲荒施錢穀迓寒施絮袍並施義地三畝鄰里鄉黨多有被其惠者

贊曰光榮捐金爲難女贖身送其歸籍光灼遇張宏聲推食解衣並恤其遺接孤女俾還鄉里是皆常人所難能者也而二宋毅然行之真義俠之士哉鑠與學詩存心濟物行義不怠亦可謂一鄉之善士也已

謹按右列衡岳于宜郭五常王誥毛祥李克敏徐文英

賈得山陳紳楊舉楊士英魏芳吳靜王之棟夏名文楊  
積石王訓張應軾尹冕張文佐徐惟性李安楊勳宋自  
勉宋繼顏趙鑑張伯楠宋光榮宋光顏趙鏐劉學詩等  
三十一人均見舊志卷之八人物篇惟敘事簡略亦未  
分類列傳此次經銘鑑參攷他書衡岳墓碑郭五常家  
傳李克敏家譜王誥  
墓碑及御及新訪冊各就其事蹟相類者爲列傳凡十  
篇其文字亦略子刪潤至劉素王胤祚張德惠三人皆  
係根據墓碑劉素  
是及新訪冊王胤祚張  
德惠是增入者陳銘鑑  
附注

劉洪起列傳二十

陳銘鑑輯

劉洪起字東橋別號扁子西平雲莊保人初爲鹽徒崇禎

六年十一月流賊高迎祥李自成等自毛家寨渡河犯中

州土寇四起洪起與其弟洪超洪道結鄉井自保又有洪

賊洪禮等與爲犄角號諸劉嘗乘夜遣人入賊中取其屬

賊頗憚之諡曰高點登多熬曲防備西平劉扁頭洪起結寨璞笠頂山團練

鄉勇數出境剿賊有功授西平千總十年春巡按御史楊

繩武署爲西平都司檄令討土寇張五平侯鷲鷲獲誅之

五月總理王家禎奏剿寇獲級有旨左良玉劉洪起等復

級授職十五年閏十一月李自成陷汝蔡列寨皆請降洪

起獨不可命弟洪超洪道守鄉里己一日夜走七百里詣

左良玉軍乞援足底入棘刺石屑弗知也十六年二月楚

撫宋一鶴奏副將劉洪起在西平與老猢猻等四家打仗

三月兵部報副將劉洪起殺死汝州僞官土寇趙發吾等歸之眾十萬有忠勇稱有詔褒獎李自成在襄陽遣一隻虎出河南擊洪起及袁時中時中尋爲自成所滅而洪起獨與之抗八月自成聞孫傳庭督秦師出關遣賊千餘人從榮澤口渡河洪起力蹙之賊逡巡南岸不敢前十七年春真陽人沈萬登與劉洪禮佐巡道韓煌守汝寧萬登中軍王民表覬洪起弟洪勛金殺而攫之洪起大怒稱兵復警煌知事不可爲與推官伍三秀避之固始四月朔洪起召其黨趙發吾郭黃臉金皋圍汝汝人糧糗牛馬俱盡彰德司理陳朱明聞京師陷南奔過汝爲劉沈議和沈不從五月朔城破萬登及其黨孫玉成陳四皆被執洪起磔之

於三里店由是自稱左南平麾下副將軍南至楚潁北抵  
大河無不奉其約束先是開封推官陳潛夫奉周王渡河  
居杞縣檄召旁近長吏歃血誓固守無應者聞洪起勇而  
好義躬往說之洪起兵號五萬潛夫兵三千盡俘杞僞官  
僞巡撫梁啟隆居開封聞風遁洪起與潛夫遂渡河而北  
大破賊將陳德於柳園會南陽賊乘閒犯西平洪起引還  
當是時開封汝寧閒列寨百數共起最大南陽蕭應訓洛  
陽李際遇列寨亦各數十諸帥中獨洪起欲效忠王室弘  
光帝正位南京擢潛夫監察御史巡按河南潛夫入朝請  
予洪起挂印爲將軍馬士英不聽初李自成攻陷汝寧時  
東寨韓華美投降受僞職出屯信陽至是復棄僞職來投

洪起令守汝寧六月朔自成右翼權將軍袁宗第聞洪起破汝自德安馳至洪起棄城走楚依左軍宗第踞城五日

卽去而入秦九月洪起自楚歸擒南陽開封諸僞官傳送

南中詔用洪起爲汝蔡總兵舊志曰勸農總兵加都督同知洪起

自稱受勅書進宮保州縣已下皆聽其署用于是卽汝寧

御史公署改建帥府極巨麗棨戟旌旗甚設明年乙酉春

洪起出軍新息光固之間徵各寨金幣充軍糧六月清將

孔希貴率兵至汝洪起敗走平頭堞中流矢卒其眾遂散

墓在縣西南滾河北岸劉樓西原右傳係采自明史左良玉陳潛夫列傳吳梅村

氏綏寇紀略及通鑑輯覽西平舊志諸書纂輯而成

贊曰明季鬪賊痛毒中原望風而靡者多矣獨洪起奮自

田閒力與賊抗不可謂非一時之人豪也雖其後爲清將所敗而志節皎然於乎可謂烈矣

金梁桂林列傳二十一

漢金梁先生不知何許人以下隱金梁橋董永子思見其母問卜于先生先生告之曰城南十里有池七月七日羣仙浴其中列衣于岸數至七則汝母衣也抱衣以俟自獲見母至日詣其處果然永子哀泣呼母曰兒何以知至此曰邑中有金梁先生告兒也乃取一簪付子謝之送兒于坡執手泣別今號其坡曰離兒坡池曰仙侶池後永子至城先生榭關不納以簪投之隙火爇其廬先生不知何往明桂林出家寶嚴寺苦行數十年壽百餘歲正統九年刻



期辭眾而化

贊曰舊志載金梁先生說近詭異與費長房遇壺公及嚴君平識織女支機石事頗相類殆皆子虛烏有之流亞與然古今記述若此者多矣若夫桂林以縉流享大年預知死生或亦修道有得者乎

金梁桂林事均見舊志

西平縣志卷二十三終

西平縣志卷二十四 文獻志 人物篇三

樊中林列傳二十二

樊中林一曰忠林明舉人西平安撫保上里樊樓村人也家貧鉅富有田百餘頃明亡絕意仕進朝廷累徵不起會有以蜚語中傷之者吏捕之急中林聞風挈家遠遁不知所終今中林故宅花園及跑馬道遺跡猶存

贊曰滿清初入關時義兵四起蓋猶有華夷之見存焉中林不肯應徵當亦別具隱衷歟易繫辭曰君子見幾而作不俟終日揚子曰鴻飛冥冥弋人何篡殆中林之謂與於乎可尙也已

張高雋列傳二十三 子平浣孫知通附

張高雋字子佳號荆園西平合水鎮人明增生父炳然邑庠生員高雋性警敏寡言笑少習舉子業下幃攻苦年十七補諸生事親至孝遇弟高斌金標極友愛從子平藻幼孤無依撫教如己子卒成立高雋喜肄古文詞善書尤酷好吟咏晚年與同里黃睿宣遂平魏端子結社唱和值明季兵燹之餘蒿萊滿目而三人常相過從歌聲達戶外時人多以詩翁呼之著有荆園詩集子平浣

平浣字公潔號清庵幼穎異讀書目數行下康熙甲辰年十四入泮十八食廩餼二十二拔萃貢成均因赴都謁選中途遇警遂返肆志林泉善治生產增田三十餘頃通聲伎與從兄平藻共教家伶一班終日扮演爲樂晚授扶溝

縣教諭在任七年督課有法士子咸稱頌之著大中講義一卷子三芳圮諸生芳琳太學生芳珂諸生芳圮後六世  
而知道生

知道字達夫號棠邨咸豐癸丑歲貢生爲高雋八世孫幼者讀年十九補諸生尋食廩餼鄉試房薦八次卒不售工詩賦能文尤善彈古琴道光閒嘗館於權寨亦園四年詩人陳蔚昌諸生陳炳陳煇皆其高足也著有友竹齋詩文集

贊曰高雋朱明之遺民也遭逢鼎革匿晦韜光日與黃魏二子歌詩唱和殆古之所謂佯狂避世者與獨惜其荆園詩集竟弗傳也平浣少年拔萃其才器自非凡庸乃一遇

挫折卽不復上進殆猶有先人遁世之遺風歟雖司鐸扶  
溝與馳逐名場者異矣知通淹博風雅爲邑名士吾先德  
其文明甫二公均師事之而亦園詩存並有知通題詞吾  
讀其詩益想見其爲人矣

譚瑄列傳二十四

譚瑄原名吉瑄字護城號左羽西平人原籍浙江嘉興祖  
昌言明萬歷辛丑進士官山東布政司參政父貞良崇禎  
癸未五經進士歷官兵科都給事中加太常卿南京陷貞  
良走閩海歿於漳州之瑄溪母秀水朱氏生五子瑄其仲  
也清康熙元年瑄遊汝寧府幕曾佐金長眞太守鎮修府  
志八年己酉科以西平籍中順天鄉試舉人二十二年知

江西弋陽縣事時值閩變之餘瑄多方招集開墾荒田數百頃增市廛二百家葺學宮修邑志禁鬻女課士愛民治新糶最尋擢禮科給事中轉工科掌印給事中楚省兵亂上官皆新除道遠未至瑄疏請以在京官速赴任董之又六計弊吏年老者多以廣文充數瑄疏言貢士需銓時年老甫得官而復以老去請勿劾瑄工詩文與秀水朱彝尊海寧查慎行迭有唱和長洲沈德潛並選瑄詩入別裁集瑄著有涵萬樓疏稿續刑法敘略康熙庚辰三月十六日卒年七十有四配沈氏封宜人子有年丁卯科舉人歷知靈寶江寧縣

贊曰弋陽作宰績著名揚擢任給諫陳策堂皇春容風雅

朱查頡頤涵萬樓高仰止徬徨

謹按瑄修弋陽縣志事在康熙二十二年其自撰志

序有云瑄先世自天中徙浙右序尾署西平譚瑄復考嘉興譚氏家譜略云譚氏自宋南渡時由河南徙浙由是可見瑄先世爲西平人而康熙己酉科以前瑄復取得西平籍矣嘉慶元年汝寧府志云瑄汝陽人或係因瑄曾讀書郡齋譚籍鄒嶺細觀隸而傳誤耳又本傳係采舊志與江西通志嘉興府志弋陽縣志嘉興譚氏家譜及譚君新嘉碧漪集合組而成字俱有來歷也新嘉字志賢諸生浙右嘉興人瑄之後裔見充國立北平圖書館中文組長著有碧漪集已梓行世又舊志瑄字護城曾祖可賢考授通判云云今考嘉興譚氏家譜瑄字護城高祖可賢字思齋庠生議敘通判曾祖守範字子貽以子昌言貴累贈如其官是舊志所載瑄字及其曾祖名均有誤謹更正

### 趙永漲張素裕張惠民列傳二十五

趙永漲字纓可國子監學生西平儀封鎮人少儻急公

義西平汝河上承舞陽之濩水下流至朱皋鎮入淮每歲

夏秋河水氾濫西平上蔡汝陽新蔡固始諸邑並受其害

自元明以來壩舞陽之渦口截濰北流入澧屢修屢圯乾隆十五年河南巡撫鄂容安建議議修築檄下丞讓卽以身爲請因其故跡是完是增計費二千金蓋濰水匯西甯請山之水於舞陽入澧沙沙河卽北汝河下流至周家口與賈魯河會東流入淮則所過地少而害輕趨西平合於汝水則所過地多而害大故也其後壩潰復修費又數千皆丞漲任之至今沿河居民受其賜

張素裕西平人事母孝值歲饑母曰凡比屋而居者多宗族姻婭也吾家忍獨飽餒乎素裕卽銜母命捐地數十畝並出布綿及所儲穀贍之有司以其事上聞得旨旌表

張惠民西平人縣北關泥河界在西平與鄆城之間河有



九孔橋本郟屬也橋壞惠民獨力修之費三百餘金  
贊曰永漲截濼北流入澧一役凡西平洪河下游各邑咸  
受其賜今所傳舞陽鍋堵口壩工者卽永漲治水之遺跡  
也素裕銜命賑饑惠民獨力築橋皆濟人利物之事雖不  
及永漲樹績之偉大抑亦可以稱矣

趙宗猷列傳二十六

子伯升孫成蓋附

趙宗猷字相如號龍池西平師靈鎮牛厰村人也雍正七  
年己酉科拔貢以親老不赴朝考讀書養志天爵自得著  
有五經大意詩學啟蒙龍池居士集等書其春秋大意立  
說一本朱子而參以論孟識者謂足與胡傳頡頏善草書  
有趙草聖之目卒年五十有三世稱龍池先生子伯升孫

成蓋

伯升字晉甫號暘谷增貢生潛心洛閩之學家富購書數千卷日夜靡枕其中有難以極僻典故者輒應口誦答其淹博如此著有戰國策歸正學庸羽翼左傳提綱紫陽讀書法

成蓋字德弼一字忠化號夢餘諸生綜祖父所著書以集其大成自著有詩史文史搔首集今惟詩史尙存

贊曰余嘗讀宗猷春秋大意龍池居士集伯升戰國策歸正成蓋詩史諸書竊歎其造詣所至固有不可以常情測者獨自咸豐兵燹已後趙氏書多散佚家業凋零卽其後嗣得諸灰燼之餘者亦復無力剗剗末由流傳可惜也

邵寶華列傳二十七

邵寶華字荆獻號純齋先賢康節先生二十七世孫明初有諱可進者由洛陽遷西平遂爲西平人居縣西七十里洪保邵灣村祖坤若拔貢父謙恆諸生母袁氏寶華生而穎慧十齡五經成誦有異人相之曰神清骨秀當超凡入聖初應童子試見吏搜夾帶怫然曰國家待士何輕侮乃爾拂衣徑歸隱居讀書無所不窺周易四子書皇極經世尤邃所著易經引端論地球形狀及日月蝕與泰西學說若合符節精天文數學凡年穀豐歉人事休咎均測驗如神四方問學者踵至會白蓮教興風靡一世寶華獨斥爲左道戒鄉里勿惑未幾教主劉之協果伏法眾益服嘉

慶十六年文襄公長齡巡撫河南里人告縣官蔽賢不舉  
長齡徵寶華至大梁問治河策不對勸以仕亦弗應或問  
故答曰吾若因人訟官而得顯如出處何郡守費庚吉禮  
賢好士汝南人士多歸之寶華抱道自重辟弗往或蜚語  
誣其妖異庚吉召至署與語數日嘆曰邵先生學道人也  
優禮還山由是深自韜晦不露圭角問以未來事緘口不  
言迫之則曰皇極經世吾祖言之詳矣夫何贅爲道光中  
嘗與客步洪河上遙望東南喟然曰兩粵三江不出十年  
必多故已而果有洪楊之亂論者比之康節天津橋聞杜  
鵬云道光三十年九月初九日卒壽百有三歲葬邵灣村  
東北之原距洪河北岸五里妻魏氏趙氏子二曰五典曰

懷信著有周易解周易說約四書餘鑑邵注四書皇極經世續編自省觀人表等書惟易經引端刊行於世

贊曰余少時習聞寶華先生之名嗣讀邵學使松年輯軒博紀載先生行誼益傾慕之光緒三十三年夏余因調查義學迂道先生墓下展謁低徊不忍遽去賢者繫人之思固如是乎易曰遯世无悶又曰不事王侯高尚其事於戲先生殆庶幾焉

劉范二趙陳劉列傳二十八

劉際辰字霞舉西平坊廓保人父懋增生際辰乾隆閒恩貢生官溫縣儒學教諭清慎儉約寬厚和平士林咸宗仰之鄉居孝友素著親仁善鄰從不干官府事能文累薦不

第教授後進成材甚多進士宋樹甲舉人范克勤趙五春謝心本拔貢孫國歲貢王居易杜謙受恩賜副榜李瑩廩生楊權皆其及門弟子也嘉慶十一年壽九十門弟子製詞公祝一時稱盛事焉子四錕錚歲貢生銳廩膳生鏗

范克勤字懋修號靜齋西平安撫保上里人幼聰慧異常兒年十三入邑庠十八補廩餼乾隆甲午科鄉試中式舉人學問淹貫樂育人材官永城教諭受業門下者多成就翰林院檢討趙詒舉人陳德元王敏學副榜劉棻皆其高足弟子尋選授山東掖縣知縣以門人堅留不果往著有靜齋文集

趙五春字慕陶西平崇教保趙丁莊人嘉慶三年舉人官

南陽縣儒學教諭著有柳溪齋文集

趙方舟字濟之西平人居城內雲路街嘉慶十三年舉人  
操行高潔以誘掖後進振助貧乏爲務終其身不干官府  
事著有訓蒙小品詩賦標新等書

陳少南字稚星西平合水鎮人廩生博學能文光緒壬午  
科鄉試堂備未售時論惜之教授鄉里及門成達者甚多  
舞陽張編修廷燎亟稱之著有三餘齋詩文集深柳堂課  
稿子子明諸生

劉西川字靜庵號鏡吾西平坊廓保下里芳莊人少從臨  
漳李勉齋先生釗游文名冠一時咸豐辛酉科拔貢例應  
就州判職以母郭氏老不果尋湖北學政高釗中聘其襄

校試卷亦不往先後主文城定穎兩書院講席沐其教者  
多成材親沒後歷署安陽教諭南陽府學教授等職俱有  
賢聲光緒閒知縣左輔性高亢少所許可獨對西川推崇  
備至謂其操行謹嚴不媿爲邑紳中第一流人物云著有  
汲古山房集妻閻氏有淑行封宜人

贊曰際晟者儒碩望年登大臺門弟子又多掇巍科其人  
之品詣學養從可知也克勤不辭學官而棄縣尹樂育人  
材之心至矣五春少南俱有著作方舟操行高潔西川堪  
與伯仲殆皆近世之君子人哉

于劉趙劉李鄭朱列傳二十九

于凌雲字霄漢西平永豐保下里姬莊人父應兆諸生官



延津縣訓導母楊氏凌雲乾隆四十二年舉人天姿英敏  
學問淵博著有大學解

劉培坤字謙山西平范二郎保上里人咸豐六年恩貢生  
性豁達不拘拘於小節博極羣書文思敏贍下筆千百言  
立就每歲設館授徒從游者戶外屢恆滿一時稱良師焉  
著易經海螢一書

趙殿陛字蔚亭西平師靈鎮牛廠村人咸豐閒恩貢生敦  
品勵學著有四書析義

劉清灼字見三號燦亭西平崇教保上里劉莊人同治庚  
午科舉人官祥符教諭二十餘年出其門者多知名之士  
著有易經備旨引解

李素甲字樸臣西平王寨保上里人布衣家貧苦讀研通經學歲貢生譚天一陳錫銘皆其及門弟子也著四書綱目

鄭贊臣字子襄西平常濟保鄭樓寨人候選縣丞家富好施喜研周易並卜筮堪輿之學皆精每測人未來吉凶罔不應驗光緒二十八年二月卒年五十有二著有周易啟蒙子長嶺

朱振玉字溫如西平人居城內雙龍街廩貢生祖宗智父純儒均有高行鄉里稱其長者振玉品行端重宣統元年知縣姚詩聰薦充孝廉方正辭不應以授徒著書終其身民國初縣知事洪壽昌以高山仰止額其門著有四書類

典釋義文集作詩要義水利志蠶業淺說農學說略西平  
防守策訓徒日記表等書

贊曰二劉及鄭均以著易稱于趙李朱或解大學或研討  
四子書其原著吾皆未之見自不容贊一辭也顧念光緒  
二十一年余侍先大夫讀書棠谿之上數聞范保父老稱  
述培坤經明而行修踰二年丁酉鄉試又隨先大夫至大  
梁時清灼任祥符教官已歷年所一日過其廬衙齋蕭然  
草滿而弗除二劉夙號博通周易造詣所至雖不敢知而  
其人其學固已冠絕一鄉矣

四趙列傳三十

趙性壹西平城內雲路街人雍正元年舉人沈靜嗜學遇

物和而寬鄰里咸以道學先生稱之

趙松垣字環久西平城內雲路街人嘉慶戊寅科鄉試副榜教授生徒以務正安分爲主嘗曰爲善是獲福之本作惡乃受禍之由性嗜飲而有節每值休沐之日由塾歸家必治備酒肴招致故舊飲燕並爲說禮講道一時鄉鄰族戚多有薰其德而感化者

趙信成字九齋西平人居城內雲路街歲貢生道光二年任長葛訓導每值朔望必傳集諸生至明倫堂爲講孔孟之學與效法聖賢之道先器識而後文藝久之聽者咸悅服文風丕振及任滿去職長葛人士特爲製送錦屏以榮其行云

趙漢狎西平城內雲路街人歲貢生設帳文廟內講說不  
倦一時從游者綦眾尤好持正論急公義見越禮者必力  
加規勸遇鄉里公共利益事必倡率實行而後已

贊曰四趙先生皆居近官府而講道傳教不干外務易曰  
履道坦坦幽人貞吉其四先生之謂與

楊權列傳三十一

子耀奎附

楊權字協中西平城內萬家巷人歲貢生爲諸生時每應  
試輒冠其曹文名噪甚道光二十年庚子鄉試副主考官  
汪元方閱權卷大爲激賞擬列第一名而正主考官博迪  
蘇抑置第二元方力爭不得憤曰必令屈居亞元無寧留  
待次科領解之爲愈也竟撤卷去未幾元方銜朝命南下

道經西平縣官郊迎元方詢悉權年已五十愀然謂縣官曰當初閱卷時覺其文氣蓬勃意必少年人今若此吾實悞楊生不淺權嘗館於權寨陳氏門徒八人一日以穆穆文王四字題課徒文皆不佳權各爲改作一篇適學政莅郡典試徒悉往應考題如舊榜發七人皆獲雋其一因忘卻宿構故落選也子耀奎

耀奎字戴六成豐十年恩貢生家貧力學文名與父埒鄉試房考官屢薦弗售性坦白無城府論學宗法孔孟教生徒子弟先品行而後文藝及門成就者百餘人任俠尙氣遇鄉里不平事必力爭得平而後止咸豐同治間捻匪數攻縣城耀奎守南門卒無恙孫煜熙毓祥毓杰均諸生

贊曰楊權父子俱以能文稱而文皆不傳豈八股制藝固  
不足以傳耶使權早掇巍科獲居上都與當時古文家交  
游攻錯其成就必不止此乃因司文柄者意氣互爭遽遭  
擯棄以致終老窮鄉莫由騰達烏虜豈非命哉豈非命哉

陳趙張劉二王胡朱列傳三十二

陳克灼字哲公西平常濟保權寨鎮人也廩貢生乾隆閒  
官彰德府學訓導廉正和平諸生誦之

趙士緇字宜俊西平儀封鎮人歲貢生博學能文應諸生  
試冠軍者凡五次著性理書與同里邵寶華王同善校刊  
理學宗傳行世道光七年大風發屋村民皆被災獨士緇  
安寢無恙子連珠

張良璫字崑巖號式渠西平洪村保人國子監學生性瀟灑工詩尤多義舉著有除病集詩草一卷

劉校書字藜閣一字石渠西平常濟保下里大劉莊人道光乙酉科拔貢能詩工賦設教鄉里門弟子慕屨有至自許宛從游者而詩人陳蔚昌與之爲友亦園詩中所稱劉八丈者卽其人也著有芥園詩集

王以德字本立西平崇教保上里人同治壬申恩貢生穎悟過人博學善教從游者四面而至多有被其陶鎔而成材者著澹香齋文集兩卷

以德一作以得

王守恕字鏡堂西平洪村保上里劉集人增貢生性耽屬雅工詩陳國順卽其及門高第也著有鏡堂詩賦稿



胡汀字芳洲西平撫治保下里前胡莊人光緒庚寅恩貢  
生少與弟炳從鄆城周南先生游勤學攻苦每飯須炊白  
自治饗飧一日其弟以餅與蒜汁進汀時方觀書誤以餅  
和墨瀋且啖且觀及弟至徹盞餅罄而蒜汁宛然問其所  
以汀瞠目不能對諦視之則硯池墨水已被喫盡矣一時  
傳爲佳話其後授徒三十年成就甚眾旣沒門弟子爲樹  
德教碑於其墓側炳諸生孫紹安優廩生

朱炳字午亭西平崇教保下里朱莊人也歲貢生爲諸生  
時頗負文名鄉試屢薦不售及門受業者多採芹食廩餼  
以去潢川縣知事趙麟紱卽其高足也

贊曰克灼以廉正和平稱士縉以講究理學稱良墩校書

守恕以風雅稱以德汀炳以善教授稱雖其畢生建樹無甚奇偉可觀要皆不失爲一鄉之翹楚抑校書詩歌事蹟僅散見於亦園詩存朱炳梗概乃得自麟紱傳述比類次之太史公所謂附驥尾而行顯昌黎伯所謂莫爲之後雖盛不傳者此也

侯二趙楊陳衡陳蕭列傳三十三

侯爵字菊田西平城內人乾隆己酉科拔貢博學工書乞書者踵趾相接品格高潔終日杜門讀書不與官府爲緣趙演寅字芳宣號柳庵西平崇教保上里人嘉慶甲戌歲貢生官新鄉訓導品端學粹諸生咸欽重之晚年設教浚水之上四方來學者眾常舍不能容學者稱爲浚水老人

著宣懷集時文正格各一卷五經四子書並有批解

趙建寅字運辰號雪樵西平崇教保上里人嘉慶己卯歲貢生幼失學稍長嗜讀書聰穎邁人未五年以案元入庠尋食廩餼著有雪樵詩文集

楊兆麟字雪舫西平城內南街人道光己酉科拔貢幼聘婦崔氏貌陋父母偵知之懼不相容將卻聘而別擇焉兆麟諫阻遂迎娶入門相敬如賓兆麟設教於西遂之間及門成就者四十餘人尋以功由州判保升知縣在籍候選子永亮

永亮字寅工歲貢生候選知縣官柘城教諭恪承家學工詩古詞賦行誼端方邑人奉爲圭臬鄉鄰之不軌於正者

嘗曰寧願刑罰加身勿令寅工先生聞之其爲時人所敬畏如此光緒丁酉歲知縣左輔初下車卽摘著名士紳十人謚曰訟師揭之通衢招人訐告而於永亮獨優禮有加子二毓桐廩生毓楠附生

陳錫銘字箴五西平大堰保下里商莊人歲貢生與兄錫庚極友愛教授鄉里後進多成就子庭荃諸生

衡濟川字蓮舫西平留册保上里人光緒丁酉科拔貢少從縣學訓導李勉齋先生游文名與劉西川埒一時有二川之目每應諸生試輒冠軍而數奇終不第年六十始拔萃貢成均鄜城上蔡二邑多有踵門受業者

陳少卿字來臣西平合水鎮人光緒丁未歲恩貢生以縣

悉用事親稱孝西學興鄉儒詆排甚力少卿獨就乃祖廉  
亭所置義塾改良擴充以誘啟後進風氣漸開丙午春仁  
義會匪作亂閭閻洶懼少卿戒眾勿擾曰么麼小醜行當  
自就夷滅矣已而果如其言年七十八無疾而卒

蕭景瑞字輯五一字星帆西平坊廓保下里柳村人廩貢  
生家貧舌耕自養教人以務本爲先出其門者多恂謹自  
愛之士

贊曰方余爲秀才時曾謁永亮先生於其家丰度端凝望  
而知爲宿碩之士丁酉拔萃科考余與濟川同入場其時  
余年方弱冠而濟川雙鬢斑白精神殊健王丁未夏余任  
邑勸學總董因調查義塾晤少卿於合水年已周甲里人

方製錦稱觴並乞余爲文壽之迄今追思皆恍如夢寐侯  
爵工書錫銘善教其子姪屢聞長老言之兆麟不嫌妻醜  
自是美德子孫克承堂構宜哉演寅設教浚水之上慕化  
者遠道相從坐無隙地可想見一時之盛宜與建寅景瑞  
二君並稱也

劉袁張鄭朱苗趙列傳三十四

劉曉樓字霽雲西平新豐保上里劉槐莊人道光乙巳歲  
貢生賦性曠達才學過人講學於西遂汝蔡之間一時名  
士多出其門每一藝出人爭傳鈔著有勸善歌教難歌至  
今鄉人士猶稱膾炙焉

袁應西字位庚號金渠西平常濟保下里袁坡村人諸生

每應試輒列前茅初館於鄆城沈氏嗣以從學者眾乃築室西莊以教授鄉里寒峻一時應童子試者爭誦其文以資模放其後鄉試屢薦弗售遂絕意舉子業研究性理小學兼通醫術嘗出資畀同里陳某設肆售藥冀惠鄉鄰一日鄰人持錢市藥應西躡陳某足示寡取某不省嘆曰一本萬利吾不忍爲也卽日閉肆其他義行多類此同治三年閏八月十八日卒於家壽八十著增高錄製錦錄百篇鈔等書

張瑤津西平范二郎保下里人廩膳生天姿英敏博學多聞遂平下宋村李氏慕其學行設館聘教子弟歷二十年屢辭不獲及門者多成就知縣李觀方訓導李觀璧皆其

高足也著詩文集各一卷

鄭名卿字君顯西平新豐保上里管莊人同治丙寅歲貢  
生品方正寡言笑慕程明道先生爲人嘗舉以自況設館  
教徒恥與官府交接通醫學詩文課餘兼授岐黃業故出  
其門者多良醫焉

朱蘭馨字南陔號樸齋西平雲莊保宋營人光緒庚辰歲  
恩貢生鄉居設塾教人取值甚廉四方來學者眾蘭馨教  
士以敦品爲先制藝次之尤喜爲人排解紛難鄉鄰因事  
訟爭往往得一言輒解其有因感德而餽遺者悉堅拒弗  
受

苗雲秀字毓卿西平常濟保苗張莊人光緒己丑歲恩貢



生鄉試屢薦弗售設教家園負笈從游者甚眾束脩有無及多寡均非所計也

趙三畏西平崇教保上里趙倫莊人諸生所爲八股文犀利醒豁讀之解頤從游者多採芹時人號爲秀才母云贊曰曉樓曠達應西謹厚瑤津蘭馨雲秀皆以育才爲樂名卿儒而知醫三畏文利小試此其大較也抑聞同治甲子鄉試應西挈孫永齡赴汴應考其時應西年已八十例得恩賜副榜會永齡道病應西中途而返旣未與試自無遽膺賜典之理俗傳應西爲恩賜副榜殊不確卽實有其事亦烏足爲之增重哉初瑤津館宋氏數年聲譽鵲起或聞而慕之爭以厚幣相邀李觀方母氏聞而大驚乃密遣

使者倍其幣數預輸十年脩金於瑤津家屬由是瑤津不  
忍言辭嗚呼李母亦賢矣哉